

陆宣公集

第二函  
第一册

陸宣公奏議卷之二十

。謝密旨因論所宜事狀

前日顧少連奉諭密旨，每於延英對卿，緣有諸人，言不得盡，中間卿所奏去冬薦人，實緣對趙憬執論，所以有言相拒，亦不是阻卿之意，若有要便事，但依前者意旨，自手疏密封進來，卿又頻與苗粲進官，朕未放過，恐卿未知朕意，此人卽苗晉卿之子，晉卿往年攝政，曾有不臣之言，又諸子皆與古帝王同名，意甚不善，緣非諸子



之過不欲明行斥逐終是不合令在朝廷卿宜  
密知此意苗粲兄弟並改與在外閑僻處官仍  
不得令近兵馬者猥蒙天慈屢降深旨慰眷稠  
疊誨諭周詳骨肉之恩無以加此士感知已尚  
合捐軀臣雖孱微能不激勵至於彌綸庶績督  
課羣官始終不渝夙夜匪懈是皆常分曷足酬  
恩自揣凡庸之才又無奇崛之效唯當輸罄忠  
節匡輔聖猷衆人之所難言臣必無隱常情之  
所易溺臣必不回罔然貞心持以上報此愚夫

真話

一志而不易者也。惟明主矜亮而保容之，頃以去冬薦人，頻於街衢披訴，既是准制許集，理合量才授官。進擬再三，未蒙允許，伏慮事轉淹滯，所以因對奏陳，憐於忖量，推理輒發，以趙璟與臣並命，俱掌樞衡，參奉謀猷，事當無間，不知避忌，輕瀆宸嚴，陛下特宥蠢愚，曲加獎導，寵遇踰等，恩私倍常，顧惟何人，叨幸若此，偶有所見，敢不盡言，是彰無隱之誠，以申上報之分。臣聞王者之道，坦然著明，奉三無私，以勞天下，平平蕩

蕩無側無偏，所謂三無私者。如天之無私覆也，如地之無私載也，如日月之無私照也。其或有過，如日月之有蝕焉，過也。人皆見之，更也。人皆仰之，日月不疾於蔽，虧人君不吝於過，失虧而能復，無損於明，過而能改，不累於德。昨者臣所奏事，惟有趙憬得聞，陛下已至勞神，委曲防護，是於心膂之內，尚有形迹之拘。職同事殊，鮮克以濟，恐爽無私之德，且傷不吝之明。夫元首股肱，義實同體，諮詢獻納，一日萬幾，宣之使言，猶



未盡意。言若有阻。意何由通。啓沃旣難。機務斯  
壅。雖荷綢繆之顧。實增曠察之憂。仰希聖聰。更  
賜裁處。苗粲少以門子。早登朝班。歷拾遺補闕。  
起居員外郎中。前後二十餘年。溫恭有加。恪慎  
無怠。端敏足以守職。文學足以飾身。詳其器能。  
堪處近侍。陛下以粲先父。常有過言。名子之方。  
又乖義類。不忍明加斥黜。但令改授外官。伏以  
理國化人。在於獎一善。使天下之爲善者勸。罰  
一惡。使天下之爲惡者懲。是以爵人必於朝。刑



人必於市。惟恐衆之不覩。事之不彰。君上行之  
無愧心。兆庶聽之無疑議。受賞安之無怍色。當  
刑居之無怨言。此聖王所以宣明典章。與天下  
公共者也。獎而不言其善。斯謂曲貸。罰而不書  
其惡。斯謂中傷。曲貸則授受不明。而恩倖之門  
啓。中傷則枉直莫辨。而讒間之道行。此柄一虧。  
爲害滋大。凡是譖愬之輩。多非信實之言。利於  
中傷。懼於公辨。或云歲月已久。不可究尋。或云  
事體有妨。須爲隱忍。或云惡跡未露。宜假他事。

爲名。或云但棄其人。何必明言責辱。詞皆近於  
情理。意實包於矯誣。傷善售姦。莫斯爲甚。伏惟  
聖鑒之下。必無浸潤之流。然於稱毀之言。不可  
不辨。賞罰之典。不可不明。陛下若以晉卿跡實  
姦邪。粲等法應坐累。則當公議典憲。豈令旣受  
播遷。陛下若察晉卿見誣。又知粲等非臯。則合  
隨手獎用。不宜降意精防。今忽不示端由。但加  
斥逐。謂之掄材。則失序。謂之刑罰。則無名。徒使  
粲等受錮於聖朝。晉卿銜憤於幽壤。以臣蔽滯

未見其宜。夫聽訟辨讒。貴於明恕。明者在驗之。以跡。恕者在求之。以情。跡可責而情可矜。聖王懼疑似之陷。非辜不之責也。情可責而跡可宥。聖王懼逆詐之濫。無罪不之責也。惟情見跡具。詞服理窮者。然後加刑罰焉。是以下無寃人。上無謬聽。苛慝不作。教化以興。晉卿起自文儒。致位台輔。能以謙柔自處。故爲三朝所推。當諒闇之辰。攝冢宰之任。是將備禮。豈足擅權。安肯露不臣之言。招覆族之釁。雖甚狂險。猶應不爲矧。



伊老臣寧忍及此。假有忍人之意。其如言發禍隨。求之以情。旣無端。驗之以跡。又無兆。宜蒙昭恕。理在不疑。又自陛下御極已來。粲及兄丕。皆歷清近。若以舊事爲累。豈復含容至今。恐有無良之徒。憎嫉丕粲兄弟。構成飛語。務欲挫傷。大抵任重勢疑。易生嫌謗。以周公之聖。不免流言。霍光之忠。亦遭告訐。向非成主覺寤。昭帝保明。則二主之德美不傳。二臣之寃誣莫辨。陛下追懷往事。得失豈不相遠哉。後之視今。固亦如此。



從來介性者尚節權謀者尚過公獨以應變百出之才操一介不荷之節真聖賢根

凡所舉措安可不詳。伏願稍留睿思，特加省察。斯實羣臣庶免於戾，豈惟苗氏一族存沒幸賴而已乎。少蓮又向臣說云：聖旨察臣孤貞，猶謂清慎太過，都絕諸道饋遺，却恐事情不通。如不能納諸財物，至如鞭靴之類，受亦無妨者。伏以貨賄之利，耳目之娛，人間常情，孰不貪悅。況臣性實凡鄙，寧忘顧私家本窶貧，安能無欲。所以深自刻慎，勉修廉隅者，蓋由負載厚恩，尸竊大任，既不克導揚風教，致俗清淳，又未能減息征

開非英雄  
豪傑可到

徭濟人窮困若無耻懼各啓賄門是忘憂國之  
誠仍速焚身之禍由是苟行特操杜絕交私誠  
知無補大猷所冀免貽深累陛下責臣以清慎  
太過斯謂皇明陛下慮事之不通有乖理道或  
恐貪恠之輩務逞無厭之求巧陳異端惑亂聖  
聽稽諸事實則甚不然夫以胥吏末流苞苴微  
貺苟或違道且猶知慙況乎公卿大臣之間方  
岳連帥之任豈資納賄然後致誠若因財利交  
歡是以姑息爲事既乖直道必有過求遂之則

法度浸墮阻之則缺望彌甚爲害如此國何賴  
焉高祖太宗著法垂制監臨受賄盈尺有刑陛  
下每發德音敷宥下土大辟之屬皆蒙滌除唯  
於犯贓徃徃不赦豈不以貪饕爲弊殘蠹最深  
至於士吏之微尚當嚴禁矧居風化之首反可  
通行凡上之所爲以導下也上所不爲以檢下  
也上所不爲而下或爲之然後可以設峻防寘  
明辟若上爲之而下亦爲之固其理也又可禁  
乎今更有受鑒臨之賄者則以爲臯不可容朝



入之居官者宜人人置此一通于座右恐人人不敢置一通于座右也。能讀此無汗顏者我且下拜。

廷之制。四方所監臨也。而宰司公受其賄。是亦無耻而不怨者歟。孔子曰。夫臣不可不敬也。是人之表也。邇臣不可不慎也。是入之道也。表傾則影曲。道僻則行邪。若夫臣邇臣。可以受財。則庶長。宋察。孰為不可朝廷取之於方鎮。方鎮復取之於州州。取之于縣。縣取之于鄉。鄉將安取哉。是皆出於疲人之肝腦筋髓耳。自大盜猾夏。耗斁生人。天下常屯百萬之師。坐受衣食。農夫蠶婦。凍而織。餒而耕。殫力忍死。以供十倍之賦。



居心粹白  
故侃侃而  
言筆無扞  
隔

無欲然後  
可以言王  
佐公其主  
佐哉

日○月○引○頸○望○觀○昇○平○之○化○惠○恤○之○恩○凡○四○十○九  
年○矣○荐○屬○多○故○有○加○無○瘳○持○利○權○食○厚○祿○者○當  
憂○隱○慍○悒○憫○愧○黎○庶○而○又○交○通○私○賄○扇○起○貪○風  
是○令○已○困○之○毗○重○遭○過○分○之○擾○陛○下○尚○以○爲○鞭  
靴○之○類○受○亦○無○妨○若○使○天○下○受○賂○唯○有○二○三○宰  
臣○四○方○誅○求○止○於○鞭○靴○細○物○行○之○不○足○以○傷○化  
絕○之○不○足○以○利○人○則○臣○固○已○微○抑○私○心○將○順○睿  
旨○矣○若○使○國○家○致○理○必○資○饋○遺○通○情○辭○之○足○以  
失○天○下○之○心○受○之○足○以○濟○天○下○之○務○則○臣○固○亦

若其全山  
而言之

不避汚行助成聖功矣。臣所以未敢奉詔冒昧  
塵煩者。審知此道不唯於無益。必有甚損。故也。  
亦冀陛下詳察其理。普澄其源。弘清淨無欲之  
風。守慈儉不貪之寶。是將感人心而天下服。何  
有事情不通之患乎。夫貨賄上行。則賞罰之柄  
失。貪求下布。則廉耻之道衰。何者。善惡不分。功  
過無辨。以貨賄之多少爲課績之重輕。守道闕  
供。或時致怨。招累。求得當欲。可以釋臯。賈榮。忍  
行刻剝者。見謂公忠。巧飾玩好者。獲稱才智。此

古今通弊

謂賞罰之柄失也。上好利則下思聚斂。上求心則下肆侵蝨。不懷愧心。但逞私欲。遞相企效。習以成風。閭閻日殘。紀綱日壞。不可以禮義勸。不可以刑法懲。此由廉耻之道衰也。作法於涼。其弊猶貪。作法於貪。其弊斯亂。利於小者。必害於大。易於始者。必悔於終。賄道一開。展轉滋甚。鞭靴不已。必及衣裘。衣裘不已。必及幣帛。幣帛不已。必及車輿。車輿不已。必及金璧。目見可欲。何能自窒於心。已與交私。固難中絕。其意是以涓



具二十分  
人品才識  
者方能讀  
此。

流不止。谿壑成災。毫末既差。丘山聚釁。自昔臣家敗亡多矣。何嘗有以約失之者乎。臣竊料郡府之不願行賄於朝廷。猶鄉閭之不願輸貨於郡府也。但以行之者有利。不行者有虞。故爲安身保位之謀。不得不行耳。夫豈樂而行之哉。假如四方俱賂於朝廷。朝廷受其三。而却其一。有所受有所却。二端相反。則遇却者。或有意疑乎。見拒而不通焉。四方俱賂於朝廷。朝廷俱辭而不受。則咸知不受者。乃朝廷之常理耳。適新



服其心而誘其善。復何嫌阻之有乎。陛下若謂  
問遺可以通物情。絜矩不足敦理化。則自建中  
以來。股肱耳目之間。蓋常有交利行私者矣。乃  
其所也。陛下何尤焉。陛下嗣位之初。躬行節儉。  
郡國無來獻。朝廷無私求。行李無黷貨之人。邇  
臣無受賂之事。四方風動。幾致清平。旋以刑峻  
賦繁。兵連禍結。理功中否。至化未凝。洎大憝殲  
夷。皇運興復。征伐之役。頗息於前時。清約之風。  
亦虧於往日。此則雖革一弊。亦喪一美焉。曩興

師徒。人困暴賦。今罷征伐。人困私求。是乃殘瘁之餘。永無蘇息之望。使萬方黎獻。當陛下休明之代。不登富壽。不洽雍熙。追懷前修。實用心熱。而議者反以納賂通情之理。以惑陛下。斯不亦誣上行私之甚者乎。夫天下公器也。王綱大權也。執大權者不任其小數。守公器者不徇於私情。任小數而御大權。則忿戾之禍起。徇私情以持公器。則姦亂之釁生。故春秋傳曰。在上位者。灑濯其心以待之。而後可以理人。言私曲之不

可以蒞衆庶也。又曰國家之敗。由官邪也。官之失德。寵賂彰也。君人者。將昭德塞違。以照臨百官。百官於是乎戒懼。而不敢易紀律。言賄利之不可以化百官也。又曰長國家者。非無賄之難。無令名之難。諸侯之賄。聚於公室。則諸侯貳言。貪欲之不可以懷諸侯也。古之懷諸侯者。蓋有其道矣。惟不務賄。然後得之。故禮記云。凡爲天下國家。有九經。其一曰理亂持危。朝聘以時。厚往而薄來。所以懷諸侯也。是知懷撫之道。貴德



賤財於往也則厚其贈送之資於來也則薄其  
贄幣之禮訓人以尊讓示人以不貪始於朝廷  
行於郡國廉耻之風漸廣浸漁之害不萌里閭  
獲安郡國斯乂郡國旣乂朝廷益尊所謂化自  
上流理由下濟近者悅服而遠者歸懷是皆無  
賄之致也及夫王綱寢壞德化陵夷然後滅公  
議而徇私情盛誅求而崇饋獻故禮記曰天子  
微諸侯僭於是相覲以貨相賂以利而天下之  
禮亂矣是知傷風害禮莫甚於私暴物殘人莫

大於賂利於絕私去賄者莫先於君主務於愛  
人助禮者莫切於輔臣然則君主輔臣之間固  
不可以語及於私賄矣況又躬行乎臣以受恩  
特深志欲巨細裨補苟懷疑慮不敢因循亦賴  
遭逢聖明庶得竭盡愚直所以每事獻替不以  
狃忤爲虞意懇詞繁伏用慚悚謹奏

議汴州逐劉士寧事狀

右希顏奉宣聖旨，適得李萬榮奏，劉士寧因出遊獵，三軍將士遂閉城門不放入，發遣令赴朝廷。萬榮安撫軍州，今已寧帖，卿等宜知悉者。伏以劉士寧昏荒暴慢，惡貫久盈，聖情愛人，久爲含忍，親離衆叛，自取奔亡。不勞師徒，克靖方鎮。恭承宣諭，欣賀實深。然梁宋之間，地當要害，鎮壓齊魯，控引江淮。得其人則安則強，失其人則危則弱。今士寧見逐，雖是衆情，萬榮總軍，且非



陸宣公集  
朝旨此亦安危強弱之機也。陛下審之慎之，或恐奏事之人，苟私所奉之將，妄陳體勢，輒欲徵求，承前授任失宜，多爲此輩所誤。假使心無詐罔，其如識乏經通，與之籌量，鮮不撓敗。今軍州旣定，足得安詳，望且選一朝臣，馳往宣勞，更淹旬日，徐察事情，見情而後圖之，則冀免有差失。候至來日，續更面陳，謹先狀以聞，謹奏。

。請不與李萬榮汴州節度使狀

右希顏奉宣進止萬榮安撫有功聞亦忠義甚得衆心若更淹遲却恐事不穩便今商量除一親王克節度使且令萬榮知留後其節度制便從內出萬榮須與改官卿等即商量進來者臣性習懦頑藝識空乏辱當獎任待臯宰司事關安危不敢容默雖服戎角力諒匪克堪而經武伐謀或有所見夫制置之安危由勢付授之濟否由材勢如器焉唯在所置置之險地則覆置

宰相用人  
之法用人

之言

之夷地則平材如負焉唯在所授授踰其力則  
踣授當其力則行故負重者不可以微劣勝器  
大者不可以輕易處有巨力而加重負猶懼蹙  
跌之不虞擇安地而寔大器尚慮傾覆之難備  
焉有委非所任置非所安而望其不顛不危固  
亦難矣劉士寧窮兇極暴衆所不容李萬榮因  
人之心閉城拒逐爲國除害亦有可嘉誠宜星  
夜上聞請擇節將今所陳奏頗涉張皇但露微  
求之情殊無退遜之禮據茲鄙躁殊異純良又



背此把握  
何患用人  
不當

聞本是滑人偏厚當州將士與之相得纔止三  
千諸營之兵已甚懷怨據此頗僻亦非將材且  
邀君而力取其位不忠逐帥而謀代其權不義  
犯此二者而加之非材得志驕盈不悖則敗悖  
謂犯上敗謂僨軍俱爲厲階莫見其可今雖遽  
加寵命務饜貪求曲示保持冀消兇慝然其所  
行不遜所得無名縱之則反側而益疑善之則  
觖望而肆惡夫善始而克終者猶寡況始於不  
善而求能以義自全者乎又緣嘗自蓄謀以危

陸宣公集  
主將及居人上恒恐見圖必於部校之間多有  
疑阻之釁上下猜貳何能久安縱未干紀亂常  
亦必喪師蹙境所以承前方鎮之任選建才德  
而不副所委者則有矣其不由才德而授能終  
殿邦固節者未之有也是猶置器欲安而不擇  
可安之勢負重欲濟而不量可濟之才處非所  
宜不敗何待陛下若謂臣說體迂濶有異軍機  
引喻乖踈不同事實臣請指陳汴宋一管近代  
成敗之跡皆陛下之所經見者以爲殷鑒惟陛

下覽而察之。往者田神功作鎮河南。領汴宋徐泗兗鄆曹濮八州之地。兵食兼足。職貢備修。左肅青齊。右弭滑魏。南控淮淝。北輔榮瀍。殷如長城。不震不聳。此由制置得可安之地。付授得可濟之材。其爲利宜。斯謂大矣。及神功入覲。遘厲不還。先皇帝示眷悼之優崇。貪因循之便易。知神玉才不勝任。排衆議而竟授之。旣而維御無方。經略失制。權歸豪將。勢散列城。禍機一興。內叛外破。委三軍於暴帥。陷五郡於匪人。轉輸所



經塗路亟阻。此由制置於必危之地。付授於必  
躓之才。其爲敗傷亦已甚矣。近者劉元佐驅攘  
巨滑。底復大梁。卽鎮於茲。幾將十載。雖不能勤  
身節用。以撫疲甿。畢力竭誠。以揚丕烈。然尚號  
令由已。部屬畏威。緝修戎旅。振耀聲勢。遠邇談  
矚。且爲完軍。制持東方。猶有所倚。及元佐殂沒。  
朝廷命吳濬代之。士寧兇頑。輒敢眦睚。素非得  
衆。且甚不材。緩之旬時。必自離沮。隨機制馭。指  
顧可平。陛下念深黎元。姑務容養。適使姦徒得

計庸豎作狂。但肆醜厲之詞。豈懷任置之惠。運  
路幾絕。生人重殘。殷然垣翰之軍。鞠爲汙染之  
俗。追思致患之本。豈不失於苟且哉。今若又授  
萬榮。則與士寧何異。負力而取。誰曰不然。邀取  
而除。孰爲非據。苟邀則不順。苟允則不誠。君臣  
之間。勢必嫌阻。與其圖之於滋蔓。不若絕之於  
萌芽。忘久遠而樂因循。固非英主御天下長算  
遠慮之計也。且爲國之道。以義訓人。將教事君。  
先令順。長用能。弭爭奪之禍。絕窺覲之心。聖人

所以興敬讓而服暴強禮達而分定故也假使  
士寧爲將慢上虐人萬榮懷奉國之誠稟嫉惡  
之性棄而違之斯可矣討而逐之亦可矣謀其  
帥而篡其位則不可焉何者方鎮之臣事多專  
制欲加之臯誰則無辭若使傾奪之徒便得代  
居其任利之所在人各有心此源潛滋禍必難  
救非獨長亂之道亦開謀逆之端四方諸侯誰  
不解體得一夫而喪羣帥其何利之有焉矧茲  
一夫猶未可保徒亂風教以生人心昨日所逐

此是一劑  
保養元氣  
之藥亦是  
攻病之藥

士寧蓋起於倉卒。諸郡守將固非連謀。一城師  
旅亦未協志。況又待之不壹。撫之不均。黨助萬  
榮。其能有幾。仍各計度於成敗之勢。迴遑於逆  
順之名。安肯捐軀與之同惡。今所以未卽變者  
皆爲萬榮所誘許。其賞給貨財且相服從。以俟  
制旨陛下。但於文武羣臣之內。選一和惠寬敏  
素爲軍旅所愛信者。命爲節度。仍降優詔。慰勞  
彼軍。獎萬榮以撫定之功。別加寵任。褒將士以  
輯睦之義。厚賜資裝。衆知保安。人且懷惠。舍此



漢宗所慮  
止在此耳  
一言道破  
打碎疑團

不務更將何求。揆其大情。理必寧息。萬榮縱欲  
跋扈。勢何能爲。三軍旣自離心。列城又不爲援。  
緣其迫逐主將。諸道必復憎嫌。邇無所親。遠無  
所與。不勞天討。必自殲夷。陛下何所爲虞。而欲  
受其邀致。臣雖孱怯。竊有未安。昨因希顏宣旨  
却廻。已與趙憬等同附口奏。展轉申吐。慮多闕  
遺。臣更通夕詳細。恐亦無易於此。不勝拳拳愚  
懇。謹復密啓以聞。如蒙聖恩察納。臣卽與趙憬  
等商量。應須處置事宜。具作條件聞奏。倘後事

有愆素臣請受敗撓之辜謹奏

卷二十一



請依京兆所請折納事狀

京兆府先奏當管蟲食豌豆全然不收請據數折納大豆奉敕宜依度支續奏稱據時估豌豆每斗七十價已上大豆每斗三十價已下京兆府所請將大豆替豌豆望令各據估計錢數折納則冀免損官司者求瘼救災國之令典求瘼在知其所患救災在恤其所無只如螟蜮爲殃豌豆全損檢覆若非虛謬地稅固合免徵直道而行大體斯在司府折納克數已爲尅下從權



度支準估計錢，乃是幸災窺利，所得無幾，其傷實多。傷風得財，非謂理道。且豌豆爲物，入用甚微，舊例所支，唯克畜料，準數迴給大豆。諸司誰曰不然？計價剩徵，義將安在？理無所據，事不可從。望依前敕處分，未審可否。

德宗好聚財則言利

之臣至而

公之禁遏

益苦心矣

每事本之

六經而動

合時宜所

以不腐不

俗

。論度支令京兆府折稅市草事狀

度支奏緣當年稅草支用不克諸場和市所得  
又少所以每至秋夏常有欠闕請令京兆府折  
今年秋稅和市草一千萬束便令人戶送入城  
輸納每束兼車脚與折錢二十五文既利貧人  
兼濟公用希顏奉宣進止宜依者伏以制事之  
體所貴有常順人之情尤重改作革而能當尚  
恐未孚動且非宜曷由無擾臣等每承睿旨嘗  
以百姓為憂審知事不可行安敢默而無述每

年蓄聚芻藁，所司素有恒規，計料稅草不克，卽便開場和市，旣優價直，復及農收，人皆樂輸，事不勞擾，陛下追想往年之事，豈嘗有緣草不足上關宸慮者乎？延齡欲銜已能，頗隳舊制，苟收經費之用，以資羸羨之功，遂使儲備空虛，支計寥落，廩圉告闕，頻煩聖聰，去歲已然，今夏尤甚。此乃不遵舊制之過也。舊制何害而變之哉？臣等謹檢京兆府應徵地稅草數，每年不過三百萬束，其中除留供諸縣館驛及鎮軍之



宰相持大體不親細務固是不妨然才具各有不同亦有親罰二十已上者乃知相

入城輸納唯二百三十萬而已。百姓般運已甚艱辛。常迫春農。僅能得畢。今若更徵一千萬束。仍令竝送入城。卽是一年之中。併徵三年稅草。計其所加車脚。則又四倍常時。物力有窮。求取無藝。其爲騷怨。理在不疑。甸服且然。四方安仰。假使時當豐稔。家悉阜殷。有草可輸。有車可載。然於途程往復。須淹歷歲時。牛廢耕犁。人妨播植。東作旣闕。西成曷期。况蒸黎之間。貧富不等。收穫之際。豐耗靡均。今忽併役車牛。雇車傭必



臣不親細  
務不是一  
定死法也

騰貴。併徵稅草。買草價必倍高。是使豪富之徒  
乘急令以邀其利。窮乏之輩。因暴斂以毀其家。  
非所謂均節財物。準平賦法之術也。臣等又勘  
度支京兆。比來雇車估價。及所載多少。大率每  
一車載一百二束。每一里給傭錢三十五文。百  
束應輸二束克耗。今京畿諸縣。去城近者七八  
十里。遠者向二百里。設令遠近相補。通以百里  
爲程。則雇車載草百束。悉依官司常估。猶用錢  
三千五百文。卽是一束之草。唯計般運。已當三

從大計議  
以至極纖  
細處觀之  
公之真身  
現矣

十有五文。買草本價又更半之。而度支曾不計  
量。自我作古。徑以胸臆斟酌。限爲二十五文。謂  
之加徵。則法度廢墮。謂之和市。則名實乖反。倘  
可其奏。人何以觀。豈如官自置場。要便收市。欲  
少市。則平其估。以節費。欲多市。則優其價。以招  
人。買賣既和。貧富俱便。有餘者趨加饒。易售之  
利。不足者免轉求貴。賃之資。比之抑徵。固不同  
等。幸有舊制。足可遵行。何必捨易而卽難。棄利  
而從害。臣誠暗滯。未見其宜。伏望戒敕度支。令

依舊例和市。承前既有恒用。以後不得闕供。稍峻隄防。使知懍懼。妄作但不施用。歲計必免愆違。陛下若以軍廩之中。馬畜漸衆。度支所營藁芻。纔可供給當年。或慮水旱不虞。別須蓄積爲備。今屬歲稔。亦是其時。但要收斂有方。不宜科配致擾。若度支併市。延齡必復辭難。須有區分。使之均濟。望委京兆尹勾當。別和市草五百萬束。以克貯備。其所和市。並隨要便。官自置場。每場置錢。旋付價直。時估之外。仍稍優饒。交易往



來。一依市利。勿令官吏催遣。道路遮邀。但不抑  
人。自當趨利。其市草價直。並於年支留府錢數  
內。以給用不盡者。克每市滿十萬束。一度聞奏。  
便以府司郵遞車牛。并更雇脚相添。轉徙場所。  
般載送付苑中輸納。如蒙聖恩允許。臣卽依此  
宣行。既免擾人。又不增費。以資儲蓄。足禦凶災。  
度支謹守恒規。亦自不闕常用。臣等商度。將爲  
合宜。謹錄奏聞。伏聽進。



陸宣公奏草卷之二十

終

陸宣公奏草卷之二十一

論邊城貯備米粟等狀

右兵之所屯，食最爲急。若無儲蓄，是棄封疆，自  
筭敗亂之由。多因餽餉不足，臣以任當體國職  
合分憂，奏減河運脚錢，用充軍鎮和糴，幸蒙聖  
恩允許。又屬頻歲順成，二年之間，沿邊諸軍共  
計收糴米粟一百八十餘萬石。準元敕各委當  
道節度及監軍中使度支知巡院官同勾當檢  
納，仍以貯備軍糧爲名，非緣城守乏絕及不承

別勅處分，並不得輒有費用。若能堅守此制，有用，隨卽却填，則是邊城常貯十五萬人二歲之糧，以爲急難之備，永無懸絕，足固軍情。去歲版築五原，大興師旅，所司素無備擬，臨事支計，缺然。齎送悉貸此糧，乃得軍行。辦集事過之後，准敕合填。迄今二年，竟不支遣，加以諸鎮軍食，例皆闕供。及其告急上聞，宣旨下迫，則又請貸貯粟，以充將士月糧。旣務廢墮，且無愧畏，所未匱竭，其能幾何。夫栽植至難，毀拔至易。古人以植

楊爲喻能、不爲之、歎惜哉、況水旱流行、固宜有  
備、戎狄爲患、可不爲虞、將欲安邊、先宜積穀、今  
當歲稔、令益軍儲、反罄聚蓄之資、用供朝夕之  
費、儻遇災難、則如之何、惟陛下詳思後圖、不貽  
他日所悔、臣之願也、疆場之幸也、不勝區區慮  
患之意、謹冒昧以聞、謹奏



--	--	--	--	--	--	--	--	--

胸中自有

一副經綸

樞紐不論

邊情國計

迎刃即解

請問樞紐

何在妙在

驕虜悍將

漢高所驚

畏者公獨

視之如嬰

兒毫末舉

動德宗代

宗悞為細

事者公獨

論沿邊守備事宜狀

右臣歷覽前代史書，皆謂鎮撫四夷，宰相之任。不揆闇劣，屢敢上言，誠以備邊禦戎，國家之重事。理兵足，食備禦之大經。兵不理，則無可用之師。食不足，則無可固之地理。兵在制置，得所足食，在斂導有方。陛下幸聽愚言，先務積穀，人無加賦，官不費財，坐致邊儲，數逾百萬，諸鎮收糴，今已向終，分貯軍城，用防艱急。縱有寇戎之患，必無乏絕之憂。守此成規，以為永制，臣收冗費。

視爲治亂  
根本三代  
以後有數  
人

益贍邊農。則更經二年。可積十萬人。三歲之糧  
矣。足食之原粗立。理兵之術未精。敢試籌量。庶  
備採擇。伏以戎狄爲患。自古有之。其於制禦之  
方。得失之理。備存史籍。可得而言。大抵尊卽敘  
者。則曰非德無以化。要荒曾莫知威。不立則德  
不能馴也。樂武威者。則曰非兵無以服。凶獷曾  
莫知德。不修則兵不可恃也。務和親者。則曰要  
結可以睦。鄰好曾莫知我。結之而彼復解之也。  
美長城者。則曰設險可以固邦國。而扞寇讐。曾

莫知力不足而入不堪則險之不能恃城之不  
能有也尚薄伐者則曰驅遏可以禁侵暴而省  
征徭曾莫知兵不銳壘不完則遏之不能勝驅  
之不能去也議邊之要略盡於斯雖互相譏評  
然各有偏駁聽一家之說則理例可徵考歷代  
所行則成敗異效是由執常理以御其不常之  
勢徇所見而昧於所遇之時夫中夏有盛衰夷  
狄有強弱事機有利害措置有安危故無必定  
之規亦無長勝之法夏后以序戎而聖化茂古



詳次二千  
載如線貫

誅

公以避狄而王業興。周城朔方而獫狁攘秦築  
臨洮而宗社覆。漢武討匈奴而貽悔。太宗征突  
厥而致安。文景約和親而不能弭患於當年。宣  
元弘撫納而足以保寧於累葉。蓋以中夏之盛  
衰異勢。夷狄之強弱異時。事機之利害異情。措  
置之安危異便。知其事而不度其時。則敗附其  
時而不失其稱。則成形變不同。胡可專一夫以  
中國強盛。夷狄衰微。而能屈膝稱臣。歸心受制。  
拒之則阻其嚮化。滅之則類於殺降。安得不存。

而撫之卽而序之也。又如中國強盛夷狄衰微而尚棄信忤盟蔑恩肆毒論之不變責之不懲安得不取亂推亡息人固境也。其有遇中國喪亂之弊當夷狄強盛之時圖之則彼釁未萌禦之則我力不足安得不卑詞降禮約好通和啗之以利以引其懽心結之以親以紓其交禍縱不必信且無大侵雖無御戎之善經蓋時事亦有不得已而然也。倘或夷夏之勢彊弱適同撫之不寧威之不靖力不足以自保勢不足以出

變化從心

因應隨時

身在公目

中胸中矣

諸臣

無此洋

攻○安○得○不○設○險○以○固○軍○訓○師○以○待○寇○來○則○薄○伐○  
 以○遏○其○深○入○去○則○攘○斥○而○戒○以○遠○追○雖○非○安○邊○  
 之○令○圖○蓋○勢○力○亦○有○不○得○已○而○然○也○故○夏○之○即○  
 序○周○之○于○襄○太○宗○之○翦○亂○皆○乘○其○時○而○善○用○其○  
 勢○者○也○古○公○之○避○狄○文○景○之○和○親○神○堯○之○降○禮○  
 皆○順○其○時○而○不○失○其○稱○者○也○秦○皇○之○長○城○漢○武○  
 之○窮○討○皆○知○其○事○而○不○度○其○時○者○也○向○若○遇○孔○  
 熾○之○勢○行○即○序○之○方○則○見○侮○而○不○從○矣○乘○可○取○  
 之○資○懷○畏○避○之○志○則○失○機○而○養○寇○矣○有○攘○却○之○



力用和親之謀則示弱而勞費矣當降屈之時  
務翦伐之略則召禍而危殆矣故曰知其事而  
不度其時則敗附其時而不失其稱則成是無  
不定之規亦無長勝之法得失著效不其然歟  
至於察安危之大情計成敗之大數百代之不  
變易者蓋有之矣其要在於失人肆慾則必蹙  
任人從衆則必全此乃古今所同而物理之所  
壹也國家自祿山構亂肅宗中興徹邊備以靖  
中邦借外威以寧內難於是吐蕃乘釁吞噬無



厭。回紇矜功。憑凌亦甚。中國不遑振旅。四十餘年。使傷耗遺。曠竭力蠶織。西輸賄幣。北償馬資。尚不足塞其煩言。滿其驕志。復又遠徵士馬。列戍疆陲。猶不能遏其奔衝。止其侵侮。小入則驅略黎庶。深入則震驚邦畿。時有議安邊之策者。多務於所難。而忽於所易。勉於所短。而略於所長。遂使所易所長者行之。而其要不精。所難所短者圖之。而其功靡就。憂患未弭。職斯之由。夫制敵行師。必量事勢。勢有難易。事有後先。力大

而敵脆。則先其所難。是謂奪人之心。暫勞而永逸者也。力寡而敵堅。則先其所易。是謂固國之本。觀釁而後動者也。頃屬多故。人勞未瘳。而欲廣發師徒。深踐寇境。復其侵地。攻其堅城。前有勝負。未必之虞。後有餽運不繼之患。倘或撓敗。適所以啓戎心。而挫國威。以此爲安邊之謀。可謂不量事勢。而務於所難矣。天之授者。有分事。無全功。地之產者。有物宜。無兼利。是以五方之俗。長短各殊。長者不可踰。短者不可企。勉所短。

而校其所長。必殆。用所長而乘其所短。必安。強者乃以水草爲邑居。以射獵供飲茹。多馬而尤便馳突。輕生而不耻敗亡。此戎狄之所長也。戎狄之所長。乃中國之所短。而欲益兵蒐乘角力。爭驅交鋒。原野之間。決命尋常之內。以此爲禦寇之術。可謂勉所短。而校其所長矣。務所難。勉所短。勞費百倍。終於無成。雖果成之。不挫則廢。豈不以越天授而違地產。虧時勢以反物宜者哉。將欲去危就安。息費從省。在於慎守所易。精

用所長而已。若乃擇將吏以撫寧衆庶，修紀律以訓齊師徒，耀德以佐威，能邇以柔遠，禁侵掠之暴，以彰吾信，抑攻取之議，以安戎心。彼求和則善待，而勿與結盟。彼爲寇則嚴備，而不務報復。此當今之所易也。賤力而貴智，惡殺而好生，輕利而重人，忍小以全大，安其居而後動，俟其時而後行。是以修封疆，守要害，蹙蹊隄，隱壘軍營，謹禁防，明斥堠，務農以足食，練卒以蓄威。非萬全不謀，非百克不鬪。寇小至，則張聲勢以遏其



人。寇大至。則謀其大。以邀其歸。據險以乘之。多方以悞之。使其勇無所加。衆無所用。掠則靡獲。攻則不能進。有腹背受敵之虞。退有首尾難救之患。所謂乘其弊不戰而屈人之兵。此中國之所長也。我之所長。乃戎狄之所短。我之所易。乃戎狄之所難。以長制短。則用力寡而見功多。以易敵難。則財不匱而事速就。捨此不務。而反爲所乘。斯謂倒持戈矛。以鑄授寇者也。今則皆務之矣。然猶守封未固。寇戎未懲者。其病在於謀。

無○定○用○衆○無○適○從○所○任○不○必○才○才○者○不○必○任○所○  
聞○不○必○實○實○者○不○必○聞○所○信○不○必○誠○誠○者○不○必○  
信○所○行○不○必○當○當○者○不○必○行○故○令○措○置○乖○方○課○  
責○虧○度○財○匱○於○兵○衆○力○分○於○將○多○怨○生○於○不○均○  
機○失○於○遙○制○臣○請○爲○陛○下○粗○陳○六○者○之○失○惟○明○  
主○慎○聽○而○熟○察○之○臣○聞○工○欲○善○其○事○必○先○利○其○  
器○武○欲○勝○其○敵○必○先○練○其○兵○練○兵○之○中○所○用○復○  
異○用○之○於○救○急○則○權○以○紓○難○用○之○於○暫○敵○則○緩○  
以○應○機○故○事○有○便○宜○而○不○拘○常○制○謀○有○奇○詭○而○

不徇衆情。進退生死。唯將所命。此所謂攻討之  
兵也。用之於屯戍。則事資可久。勢異從權。非物  
理所愜。不寧非人情所欲。不固夫人情者利焉。  
則勸習焉則安。保親戚則樂生。顧家業則忘死。  
故可以理術馭。不可以法制驅。此所謂鎮守之  
兵也。夫欲備封疆。禦夷戎一作狄。非一朝一夕之  
事。固當選鎮守之兵。以置焉。古之善選置者。必  
量其性習。辨其土宜。察其技能。知其欲惡。用其  
力而不違其性。齊其俗而不易其宜。引其善而



不責其所不能。禁其非而不處其所不欲。而又  
類其部伍。安其室家。然後能使之樂其居。定其  
志。奮其氣勢。結其恩情。撫之以惠。則感而不驕。  
臨之以威。則肅而不怨。靡督課而人自爲用。弛  
禁防而衆自不携。故出則足兵。居則足食。守則  
固。戰則強。其術無他。便於人情而已矣。今者散  
徵士卒。分戍邊陲。更代往來。以爲守備。是則不  
量性習。不辨土宜。邀其所不能。強其所不欲。求  
廣其數。而不考其用。將致其力。而不察其情。斯



可以爲羽衛之儀而無益於備禦之實也。何者窮邊之地。千里蕭條。寒風裂膚。驚沙慘目。與豺狼爲鄰伍。以戰鬪爲嬉遊。晝則荷戈而耕。夜則倚烽而覘。日有剽害之虞。永無休暇之娛。地惡人勤。於斯爲甚。自非生於其域。習於其風。幼而之焉。長而安焉。不見樂土而不遷焉。則罕能寧其居而狎其敵也。關東之地。百物阜殷。從軍之徒。尤被優養。慣於溫飽。狎於歡康。比諸邊隅。若異天壤。聞絕塞荒陬之苦。則辛酸動容。聆強蕃

勁虜之名。則懾駭奪氣。而乃使之去親戚。捨園廬。甘其所辛酸。抗其所懾駭。將冀爲用。不亦踈乎。矧又有休代之期。無統帥之馭。資奉若驕子。姑息如債人。進不邀之。以成功。退不加之。以嚴憲。其來也。咸負德色。其止也。莫有固心。屈指計歸。張頤待飼。僥倖者。猶患還期之賒緩。恒念戎醜之充斥。王師挫傷。則將乘其亂離。布路東潰。情志且爾。得之奚爲。平居則殫耗資儲。以奉浮冗之衆。臨難則投棄城鎮。以搖遠近之心。其弊

豈惟無益哉。固亦將有所撓也。復有抵犯刑禁。謫徙軍城。意欲增戶實邊。兼令展效自贖。既是無良之類。且加懷土之情。思亂幸災。又甚戍卒。適足煩於防衛。諒無望於功庸。雖前代時或行之。固非良算之可遵者也。復有擁旌之帥。身不臨邊。但分偏師。俾守疆場。大抵軍中壯銳。元戎例選自隨。委其疲羸。乃配諸鎮。節將既居內地。精兵祇備紀綱。遂令守要禦衝。恒在寡弱之卒。寇戎每至。力勢不支。入壘者纔足閉關。在野者



悉遭劫執。恣其芟蹂。盡其搜毆。比及都府。聞知虜已尅獲。旋返。且安邊之本。所切在兵。理兵若斯。可謂措置乖方矣。夫賞以有勸。罰以示懲。勸以懋有庸。懲以威不恪。故賞罰之於馭衆也。猶繩墨之於曲直。權衡之於揣重輕。輓軌之所以行車。銜勒之所以服馬也。馭衆而不用賞罰。則善惡相混。而能否莫殊。用之而不當功過。則姦妄寵榮。而忠實擯抑。夫如是。聰明可徇。律度無章。則用與不用。其弊一也。自頃權移於下。柄失於



朝將之號令。既鮮克行之於軍。國之典常。又不  
能施之於將。務相遵養。苟度歲時。欲賞一有功。  
翻慮無功者。反側欲罰。一有罪。復慮同惡者。憂  
虞罪以隱。恐而不彰。功以嫌疑。而不賞。姑息之  
道。乃至於斯。故使忘身效節者。獲誚於等夷。率  
衆先登者。取怨於士卒。僨軍蹙國者。不懷於愧  
畏。緩救失期者。自以爲智能。褒貶旣闕。而不行。  
稱毀復紛。然相亂。人雖欲善。誰爲言之。况又訟  
忠者。直已而不求於人。反懼困厄。敗撓者。每

而苟媚於衆。例獲優崇。此義士所以痛心。勇夫所以解體也。又有遇敵而所守不固。陳謀而其效靡成。將帥則以資糧不足爲詞。有司復以供給無闕爲解。旣相執證。理合辨明。朝廷每爲含糊未嘗窮究。曲直措理者。含聲而靡訴。誣善者罔上而不慙。馭將若斯。可謂課責虧度矣。課責虧度。措置乖方。將不得竭其才。卒不得盡其力。屯集雖衆。戰陣莫前。虜每越境橫行。若涉無入之地。遍相推倚。無敢誰何。虛張賊勢。上聞則曰。

兵少不敵朝廷莫之省察唯務徵發益師無裨  
備禦之功重增供億之弊閭井日耗徵求日繁  
以編戶傾家破產之資兼有司摧鹽稅酒之利  
總其所入半以事邊制用若斯可謂財匱於兵  
衆矣今四夷之最强盛爲中國之甚患者莫大  
於吐蕃舉國勝兵之徒纔當中國十數大郡而  
已其於內虞外備亦與中國不殊所能寇邊數  
則益寡且又器非犀利甲不堅完識迷韜鈴藝  
乏趨敏動則中國懼其衆而不敢抗靜則中國

憚其強而不敢侵。厥理何哉。良以中國之節制。多門蕃醜之統帥專一故也。夫統帥專一則人心不分。人心不分則號令不貳。號令不貳則進退可齊。進退可齊則疾徐如意。疾徐如意則機會靡愆。機會靡愆則氣勢自壯。斯乃以少爲衆。以弱爲強。變化翕闔在於反掌之內。是猶臂之使指。心之制形。若所任得人。則何敵之有。夫節制多門。則人心不一。人心不一則號令不行。號令不行則進退難必。進退難必則疾徐失宜。疾



徐失宜則機會不及。機會不及則氣勢自衰。斯  
乃勇廢爲虺。衆散爲弱。逗撓離析。兆乎戰陣之  
前。是猶一國三公。十羊九牧。欲令齊肅。其可得  
乎。開元天寶之間。控禦西北兩蕃。唯朔方河西  
隴右三節度而已。猶慮權分勢散。或使兼而領  
之。中興以來。未遑外討。僞隸四鎮於安定。權附  
隴右於扶風。所當西北兩蕃。亦朔方涇原隴右  
河東四節度而已。關東戍卒至則屬焉。雖委任  
未盡得人。而措置尚存典制。自頃逆泚誘涇原

之衆。叛懷光汙朔方之軍。割裂誅鋤。所餘無幾。而。又。分。朔。方。之。地。建。牙。擁。節。者。凡。三。使。焉。其。餘。鎮。軍。數。且。四。十。皆。承。特。詔。委。寄。各。降。中。貴。監。臨。人。得。抗。衡。莫。相。稟。屬。每。俟。邊。書。告。急。方。令。計。會。用。兵。既。無。軍。法。下。臨。唯。以。客。禮。相。待。是。乃。從。容。拯。溺。揖。讓。救。焚。冀。無。貼。危。固。亦。難。矣。夫。兵。以。氣。勢。爲。用。者。也。氣。聚。則。盛。散。則。消。勢。合。則。威。析。則。弱。今。之。邊。備。勢。弱。氣。消。建。軍。若。斯。可。謂。力。分。於。將。多。矣。理。戎。之。要。最。在。均。齊。故。軍。法。無。貴。賤。之。

差。軍實無多少之異。是將所以同其志而盡其力也。如或誘其志意。勉其藝能。則當閱其材。程其勇。校其勞逸。度其安危。明申練覈優劣之科。以爲衣食等級之制。使能者企及。否者息心。雖有厚薄之殊。而無缺望之釁。蓋所謂日省月試。餼廩稱事。如權量之無情於物。萬人莫不安其分。而服其平也。今者窮邊之地。長鎮之兵。皆百戰傷夷之餘。終年勤苦之劇。角其所能。則練習。度其所處。則孤危。考其服役。則勞。察其臨敵。則



勇。然衣糧所給。唯止當身。例爲妻子所分。常有  
凍餒之色。而關東戍卒。歲月踐更。不安危城。不  
習戎備。怯於應敵。懈於服勞。然衣糧所頒。厚踰  
數等。繼以茶藥之饋。益以蔬醬之資。豐約相形。  
隔絕斯甚。又有素非禁旅。本是邊軍。將校詭爲  
媚詞。因請遙隸神策。不離舊所。唯改虛名。其於  
廩賜之饒。遂有三倍之益。此則儔類所以忿恨。  
忠良所以憂嗟。疲人所以流亡。經費所以徧匱。  
夫事業未異。而給養有殊。人情不能甘也。况乎



矯佞行而廩賜厚。績藝劣而衣食優。苟未忘懷。孰能無愠。不爲戎首則已。可嘉而欲使其協力同心。以攘寇難。雖有韓白孫吳之將。臣知其必不能焉。養士若斯。可謂怨生於不均矣。凡欲選任將帥。必先考察行能。然後指以所授之方。語以所委之事。令其自揣可否。自陳規模。須某色甲兵。藉某人參佐。要若干士馬。用若干資糧。某處置營。某時成績。始終要領。悉俾經綸。於是觀其計謀。交其聲實。若謂材無足取。言不可行。則

當退之於初。不宜貽慮於其後也。若謂志氣足  
任方略可施。則當要之於終。不宜掣肘於其間  
也。夫如是。則疑者不使。使者不疑。勞神於選才  
端拱於委任。既委其事。既足其求。然後可以覈  
其否臧。行其賞罰。受其賞者。不以爲濫。當其罰  
者。無得而詞。付授之柄。既專。苟且之心。自息。是  
以古之遣將帥者。君親推轂而命之。曰。自闔以  
外。將軍裁之。又賜鈇鉞。示令專斷。故軍容不入  
國。國容不入軍。將在軍。君命有所不受。誠謂機

宜不可以遠決。號令不可以兩從。未有委任不專而望其克敵成功者也。自頃邊軍去就裁斷多出宸衷。選置戎臣先求易制。多其部以分其力。輕其任以弱其心。雖有所懲亦有所失。遂令分闡責成之義廢。歿綏任咎之志衰。一則聽命二亦聽命。爽於軍情亦聽命。乖於事宜亦聽命。若所置將帥必取於承順無違。則如斯可矣。若有意乎平兇靖難則不可也。夫兩疆相接兩軍相持。事機之來間不容息。蓄謀而俟猶恐失之。



臨時始謀。固已踈矣。況乎千里之遠。九重之深。陳述之難明。聽覽之不一。欲其事無遺策。雖聖者亦有所不能焉。設使謀慮能周。其如權變無及。戎虜馳突。迅如風飈。驛書上聞。旬月方報。守土者以兵寡不敢抗敵。分鎮者以無詔不肯出師。逗留之間。寇已奔逼。託於救援未至。各且閉壘自全。牧馬屯牛。鞠爲椎剽。嗇夫樵婦。罄作俘囚。雖詔諸鎮發兵。唯以虛聲應援。互相瞻顧。莫敢遮邀。賊旣縱掠退歸。此乃陳功告捷。其敗喪



則減百而爲一。其招獲則張百而成千。將帥旣幸於總制在朝。不憂罪累。陛下又以爲大權由已。不究事情。用師若斯。可謂機失於遙制矣。理兵而措置乖方。馭將而賞罰虧度。制用而財匱。建軍而力分。養士而怨生。用師而機失。此六者疆場之蝨賊。軍旅之膏盲也。蝨賊不除。而但滋之以糞。漑膏盲不療。而苟啗之以滑甘。適足以養其害。速其災。欲求稼穡豐登。膚革充美。固不可得也。臣愚謂宜罷諸道將士。畚替防秋之制。

率因舊數而三分之。其一分委本道節度使募少壯願住邊城者以徙焉。其一分則本道但供衣糧。委闕內河東諸軍州募蕃漢子弟願傳邊軍者以給焉。又一分亦令本道但出衣糧。加給應募之人。以資新徙之業。又令度支散於諸道。和市耕牛。雇召工人。就諸軍城繕造器具。募人至者。每家給耕牛一頭。又給田農水火之器。皆令充備。初到之歲。與家口二人糧。并賜種子。勸之播殖。待經一稔。俾自給家。若有餘糧。官爲收

糴各酬倍價。務獎營田。既息踐更徵發之煩。且無幸災苟免之弊。寇至則人自爲戰。時至則家自力農。是乃兵不得不強。食不得不足。與夫倏來忽往。豈可同等而論哉。臣又謂宜擇文武能臣一人。爲隴右元帥。應涇隴鳳翔長武城山南西道等節度管內兵馬。悉以屬焉。又擇一人爲朔方元帥。應鄜坊邠寧靈夏等節度管內兵馬。悉以屬焉。又擇一人爲河東元帥。河東振武等節度管內兵馬。悉以屬焉。三帥各選臨邊要會

之州。以爲理所。見置節度有非要者。隨所便近而併之。唯元帥得置統軍。餘並停罷。其三帥部內太原鳳翔等府。及諸部戶口稍多者。慎柬良吏以爲尹守。外奉師律。內課農桑。俾爲軍糧。以壯戎府。理兵之宜。旣得選帥之道。旣明然後減姦濫虛浮之費。以豐財定衣糧等級之制。以和衆弘委任之道。以宣其用。縣賞罰之典。以考其成。而又慎守中國之所長。謹行當今之所易。則八利可致。六失可除。如是而戎狄不威懷。疆場



不寧謐者。未之有也。諸侯軌道。庶類服從。如是而教令不行。天下不理者。亦未之有也。以陛下之英聖。人心之思安。四方之小休。兩寇之方靜。加以頻年豐稔。所在積糧。此皆天贊國家。可以立制垂統之時也。時不久居。事不常兼。已過而追。雖悔無及。明主當不以言爲罪。不以人廢言。罄陳狂愚。惟所省擇。謹奏。

陸宣公奏草卷之二十二

論左降官准赦合量移事狀二首

右竄謫之徒。皆在遐僻。或迫於衰暮。顧景思還。或困於瘴癘。翹心望徙。旣關霈澤。許以量移。企躍之情。遠想可見。若准所司舊例。須俟州府錄申。盤勘檢尋。動踰年歲。上稽恤宥之旨。下虧慶賴之心。臣等商量。恐須釐革。望令所司據承貞元六年恩赦檢勘。已量移未量移官。及貞元六年恩後左降官等。除遷改亾歿之外。具名銜及

澤及無量  
矣。子孫千  
億。金紫耀  
世。天之報  
當亦足相  
當。

貶謫事由年月速報中書門下。不須更待州府  
申請。臣等據所司報到。則便進擬。不出歲內。冀  
悉霑恩。未審可否。謹錄奏聞。伏聽進止。

*(Faint bleed-through text from the reverse side of the page, including characters like '臣等' and '奏聞')*

又奏量移官狀

右伏以國之令典先德後刑所後者法當舒遲故決罪不得馳驛行下所先者體宜疾速故赦書日以五百里爲程誠以聖王之心務弘慶惠必迴翔於行罰而企躍於舒恩不加罰於典法之外不虧恩於德令之內則受責者莫得興怨荷貸者咸思自新所謂威之則懲宥之斯感懲以致理感以致和致理則尊致和則愛爲人父母必在兼行陛下德配上玄澤流下土頃因郊



祀普降鴻恩。凡是貶謫之人，並許量移近處。臣等任叨輔翼，職在宣行，尋具奏聞，請便進擬。聖心精一，務欲均齊，令待所司檢尋，一時類例處分。其左降官內，或罪非可棄，才有足甄，亦許別狀商量，不拘常例獎用。臣等據所司檢勘左降官及流人送名到者，都比擬量移。及別追用，分爲三狀。前月十二日封進，其流人量移狀，已蒙印出行下訖。餘兩狀至今未奉進止，竊以赦書宣布，僅欲半年。若更淹遲，恐乖事體。又諸州刺

史及臺省官等繼有事故頗多闕員睿旨精於  
選求至今常不充備以肯掩德見非古人錄用  
棄瑕允歸聖造願廣含弘之美庶增誘拔之途  
謹奉狀陳聞伏聽進止

... 其 樂 亦 不 可 言 矣 ...

... 其 樂 亦 不 可 言 矣 ...

... 其 樂 亦 不 可 言 矣 ...

... 其 樂 亦 不 可 言 矣 ...

... 其 樂 亦 不 可 言 矣 ...

... 其 樂 亦 不 可 言 矣 ...

... 其 樂 亦 不 可 言 矣 ...

... 其 樂 亦 不 可 言 矣 ...

... 其 樂 亦 不 可 言 矣 ...

... 其 樂 亦 不 可 言 矣 ...

。又進量移官狀

右希顏奉宣進止舊例左降官每准恩赦量移。不過三百五百里。今度進擬稍似超越。又多是近兵馬處。及當路州縣事非穩便。宜更商量。伏以罰宜從輕。赦宜從重。所以昭仁恕之道。廣德澤之恩也。夫位尊者其惠不可以不重。言大者其實不可以不豐。位尊而惠輕。則體非宜。言大而實寡。則人失望。陛下躬行盛禮。渙發德音。念謫居之荒遐。哀負累之沉棄。俾移近處。將洽新



恩赦令初行。室家相慶。惠亦至矣。言亦大矣。竊料竄逐窮僻。喜聞霈澤降臨。固必破產以飾行。裝計日而俟。休命荏苒。淹卹復經。半年儻又所移之官。還與舊任鄰近。竊恐乖陛下垂愍之意。虧制書行慶之恩。口惠重而事實輕。非所以揚洪休而布大信也。謹按承前格。令左降官非元勅令長任者。每至考滿。卽申所司量其舊資。便與改敘。縱或未有遷轉。亦卽任其歸還。逮于開元末。李林甫固權專恣。凡所斥黜。類多非辜。慮

奸人心事  
說得明透

林甫貽禍  
說得直捷

罵林甫者  
仍是林甫

其却迴。或復冤訴。遂奏左降官考滿。未別改轉者。且給俸料。不須卽停。外示優矜。實欲羈係。從此已後。遂爲恒規。一經貶官。便同長往。迴望舊里。永無還期。縱遇非常之恩。許令移遠就近。雖名改轉。不越幽遐。或自西徂東。或從大適小。時俗之語。謂之橫移。馴致忌剋之風。積成天寶之亂。展轉流弊。以至於今。天下咸病此法深苛。而不能改從舊典者。良以猜嫌之慮。易惑上心。將謂負譴之人。悉包樂禍之意。已經黜責。遂欲隄

防。故高論則痛嫉林甫之陰邪。而密網則習行  
林甫之弊法。儉邪爲蠹。乃至於斯。然則左降永  
絕於歸還。量移不離於僻遠。蓋是姦臣詭計。殊  
非國典舊章。且貶黜之中。情狀各異。犯有輕重。  
責有淺深。固非盡是回邪。皆須備慮。王者之道。  
待人以誠。有責怒而無猜嫌。有懲沮而無怨忌。  
斥遠以儆其不恪。甄恕以勉其自新。不儆則浸  
及。威刑不勉。則復加黜削。雖屢進退。俱非愛憎  
行法。乃暫使左遷。念材而漸加進叙。人知復用。

誰不增修。何憂乎亂常。何患乎蓄憾。如或以其  
貶黜。便爲姦兇。恒處防閑之中。長從擯棄之例。  
則是悔過者無由自補。蘊才者終不見伸。凡人  
之情。窮則思變。貪悽貪亂。或起於茲。雖則何患  
能爲。亦足感傷和氣。謂非帝王開懷含垢之大  
體。聖哲誘人遷善之良圖也。臣等昨進擬商度  
非不精詳。旣審事宜。亦尋舊例。參求折衷。兼務  
齊平。大約所擬之官。各移近地。一道郡邑稍優  
於舊任。官資序進於本銜。並無降差。亦不超越。



其有累經移改。已至闕畿。則但易以大州。增其常秩。所冀人皆受賜。施不失平。上副洪恩。下塞延望。纔將得所。殊非爲優。今若裁限所移。不過三五百里。則有改職而疆域不離於本道。遷居而風土反惡于舊州。徒有徙家之勞。是增移配之擾。又當今郡府多有軍兵。所在封疆。少無館驛。應合量移之例。約有二百許人。道路須計其遠邇之差。州縣則校其高下之等。若必選非常。路復不近兵。則恐類例失倫。措置偏併。示人疑

慮體又非弘幸希聖聰更賜裁審其擬官狀並未敢改革謹重封進伏聽進止

陸宣公集

陸宣公集

陸宣公集

陸宣公集

陸宣公集

陸宣公集

陸宣公集

陸宣公集

陸宣公集

。論朝官闕員及刺史等改轉倫序狀

臣聞於經曰濟濟多士文王以寧又曰無曠庶  
官天工人其代之蓋謂士不可不多官不可不  
備敦付物以能之義闡恭已無爲之風此理道  
得失之所由也夫聖人之於愛才不唯側席求  
思而已乃復引進以崇其術業歷試以發其器  
能旌善以重其言優祿以全其操歲月積久聲  
實並豐列之于朝則王室尊分之於士則藩鎮  
重故詩序太平之君子能長育人才書比梓人



非才之難  
川才之爲  
難。

之理材。旣勤樸斲。惟施丹雘。禮著造士。易尚養  
賢。蓋以人皆含靈。惟所誘致。如玉之在璞。抵擲  
則瓦石。追琢則圭璋。如水之發源壅閼。則污泥  
疏濬。則川沼。是以書籍所載。歷代同途。祚屬殷  
昌。必時多雋乂。運鍾衰季。則朝乏英髦。當在衰  
季之時。咸謂無人足任。及其雄才御寓。淑德應  
期。賢能相從。森若林會。然則興王之良佐。皆是  
季世之棄才。在季而愚。當興而智。乃知季代非  
獨遺賢而不用。其於養育獎勸之道。亦有所不

分析西漢  
三王人所  
未及。

至焉。故曰人皆含靈。唯其誘致。漢高稟大度。故其時多魁傑。不羈之材。漢武好英風。故其時富懷詭立名之士。漢宣精吏能。故其時萃循良核實之能。迨乎哀平桓靈。昵比小人。疎遠君子。故其時近習操國柄。嬖戚擅朝權。是知人之才性與時升降。好之則至。獎之則崇。抑之則衰。斥之則絕。此人才消長之所由也。臣每於中夜竊自深惟。朝之乏人。其患有七。不澄源而防末流一也。不考實而務博訪二也。求精太過三也。嫉惡

太甚四也。程試乖方五也。取舍違理六也。循故事而不擇可否七也。夫多少相繆，非嘉量不平。輕重相欺，非懸衡不定。用之苟不得其道，則主者實病，而權量無尤。故按名責實者，選吏之權量也。宰相者，主權量之用也。宰相之主吏，猶司府之主財。主吏在序，進賢能，主財在平，頒秩俸。假使用財失節，則司之者可以改易，而秩俸不可以不頒。主吏乖方，則宰之者可以變更，而賢能不可以不進。其行甚易，其理甚明。頃者命官

時弊至此  
以天下爲  
戲

頗異於是常以除吏多少準量宰相重輕宰相  
承寵私則援引雖濫而必進宰相見疎忌則擬  
議雖當而罕俞是使羣材仕進之窮通唯繫輔  
臣恩澤之薄厚求諸理道未謂合宜夫與奪者  
人主之利權名位者天下之公器不以公器徇  
喜心不以利權肆忿志不以寡妨衆不以人廢  
官或其阻執事而擁羣材所謂不澄源而防末  
流之患也經曰無以小謀亂大作無以嬖人疾  
莊士蓋務大者不拘於小累謀小者不達於大



猷。嬖者或行異於莊。莊者必性殊於嬖。理勢相  
激。宜其不同。進賢援能。諒君子之事。遏惡揚善。  
非小人所能。君子以愛才爲心。小人以傷善爲  
利。愛而引之。則近黨。傷而沮之。則似公。近黨則  
不辨。而遽疑似公。則不覆而先信。是以大道每  
隳于橫議。良才常困於中傷。失士啓讒。多由於  
此。所謂不考實而務博訪之患也。夫人之器局。  
有圓方大小之殊。官之典司。有難易閑劇之別。  
名稱有虛實之異。課績有升降之差。將使官不

失才才不失序在乎制法以司契擇人而秉鈞  
制之不得厥中則其法可更而其契不可亂也  
擇之不當所任則其人可去而其秉不可奪也  
如或事多錯雜任靡適從而但役智以求精勞  
神而救弊則所救愈失所求愈麤故書曰元首  
明哉股肱良哉庶事康哉元首叢脞哉股肱墮  
哉庶事隳哉頃之輔臣鮮克勝任過蒙容養苟  
備職員致勞睿思巨細經慮每有關官須補或  
緣將命藉才宰司慎擇上聞必極當時妙選聖

八主不病  
于察病其  
不能用其  
察耳。

以聖賢作  
等閒看。半  
節論語便  
爲定太平  
矣。

情未愜。復命別求。執奏既不見從。則又降擇其  
次。如是至于再至于三。六選漸高。所得轉下。或  
斷於獨見。罔狗僉諧。或擢自庶求。不稽公議。權  
衡失柄。進取多門。等差不倫。聲實相反。此所謂  
求精太過之患也。臣聞耀秉之珠不能無類。連  
城之璧不能無瑕。矧伊有情。寧免愆吝。仲尼至  
聖也。猶以五十學易無太過爲言。顏子殆庶也。  
尚稱不遠而復。無祇悔爲美。况自賢人以降。孰  
能不有過失哉。珠玉不以瑕類而不珍。髦彥不

以過失而不用故玄元之教曰常善救人則無  
棄人文宣亦云赦過舉賢才齊桓不以射鈞  
而致嫌故能成九合之功秦穆不以一青而掩  
德故能復九敗之辱前史序項藉之所以失天  
下曰于人之功無所記於人之過無所遺管仲  
論鮑叔牙不可屬國曰聞人過終身不忘然則  
秉瑕錄用者霸王之道記過遺才者衰亂之源  
夫登進以懋庸黜退以懲過二者秩用理如循  
環進而有過則示懲懲而改修則復進既不廢



法亦無棄人。雖纖芥必懲，而才用不匱。故能使黜退者克勵以求復，登進者警飭以恪居。上無滯疑，下無蓄怨。俾人於變，以致時雍。陛下英聖統天，威莊肅物。好善旣切，計過亦深。一抵譴責之中，永居嫌忌之地。夫以天下士人，皆求宦名，獲登朝班，千百無一。其于修身勵行，聚學蒞官，非數十年間，勢不能致。而以一言忤犯，一事過差，遂從棄捐，沒代不復。則人才不能不乏，風俗不能不偷。此所謂嫉惡太甚之患也。臣聞君子

約言。小人先言，君子之道闇然而日章。小人之道灼然而日亡。孔子曰：始吾於人也，聽其言而信其行；今吾於人也，察其言而觀其行。又曰：舉直錯諸枉，則民服；舉枉錯諸直，則民不服。然則舉錯不可以不審，言行不可以不稽。訥訥寡言者未必愚，喋喋利口者未必智。鄙樸忤逆者未必悖，承順愜可者未必忠。故明王不以辭盡人，不以意選士。凡制爵祿與衆共之，先論其材，乃授以職。所舉必試之，以事所言必考之，於成然。

漢高漢武  
以此自雄

後苟妄不行而貞實在位矣。如或好善而不擇  
所用。悅言而不驗所行。進退隨愛憎之情。離合  
繫異同之趣。是由捨繩墨而意裁。曲直棄權衡  
而手揣重輕。雖甚精微。不能無謬。此則所謂程  
試乖方之患也。天之生物爲用。罕兼性有所長。  
必有所短。材有所合。亦有所睽。曲成則品物不  
遺。求備則觸類皆棄。是以巧梓順輪桶之用。故  
枉直無廢材。良御適險易之宜。故駑驥無失性。  
物旣若此。人亦宜然。其於行能固不兼具。前志

所謂千年一聖，五百年一賢者，才難不其然乎。夫唯聖人方體全德，賢之爲目，猶有未周。且以未周之才，彌五百年而有一。造次求備，曷由得人。若夫一至之能，偏稟之性，則中人以上，迭有所長。苟區別得宜，付授當器，各適其性，各宣其能，及乎合以成功，亦與全才無異。但在明鑒大度，御之有道而已。帝王之盛，莫盛唐虞。臣佐之盛，莫盛稷禹。稷禹之比，無非大賢。然猶各任所能，不務兼備。故尚書序堯舜命官之美，自稷禹



咎益以降。凡二十二人。所命典司。不踰一職。用能平九土。播百穀。敷五教。序五刑。禮樂興。和蠻夷。率服。洎鳥獸魚鱉。亦罔不寧。蓋由舉得其人。任得其所。鑒擇付授。審之於初。不求責於力分之外。不沮撓於局守之內。是以事極其理。人盡其材。君垂拱於上。臣濟美於下。功焯當代。名施無窮。及其失也。則升降任情。首末異趣。使人不量其器。與人不由其誠。以一言稱愜爲能。而不核虛實。以一事違忤爲咎。而不考忠邪。其稱愜

則付任逾涯。不思其所不及。其違忤則責望過當。不恕其所不能。是以職司之內無成功。君臣之際無定分。此所謂取捨違理之患也。今之議者多曰。內外庶官久於其任。又曰官無其人則闕之。是皆誦老生之常談而不推時變。守舊典之糟粕而不本事情。徒眩聰明以撓理化。古者人風既朴。官號未多。但別賢愚。匪論資序。不責人以朝夕之效。不計事於尺寸之差。不以小善而褒升。不以一眚而罪斥。故虞書三載考績。三

考黜陟幽明。是則必俟九年。方有進退。然其所進者。或自側微。而納於百揆。雖久於任。復何病哉。漢制。部刺史秩六百石。郡守秩二千石。刺史高第者。卽遷爲郡守。郡守高第者。卽入爲九卿。從九卿。卽遷爲亞相。相國。是乃從六百石吏。而至台輔。其間所歷者。三四轉耳。久在其任。亦未失宜。近代建官漸多。列級逾密。今縣邑有七等。異州府有九等之差。同謂省郎。卽有前中後。郎中員外五等之殊。並稱諫官。則有諫議大



夫補闕拾遺三等之別。洎諸臺寺率類於斯。悉有當資。各須循守。若依唐虞故事。咸以九載爲期。是宜高位常苦於乏人。下寮每嗟於白首。三代爲理。損益不同。豈必樂于變易哉。蓋時勢有不得已也。至如鯀墮洪水。績用靡成。猶終九年。然後殛竄。後代設有如鯀之比者。豈復能九年而始行罰乎。臣固知其必不能也。行罰欲速而進官欲遲。以此爲稽古之方。是猶却行而求及前人也。頃者臣因奏事。論及內外序遷。陛下乃



言舊例。居官歲月皆久。朕外祖曾作秘書少監。一任經十餘年。董晉將順睿情。遂奏云。臣於大曆中曾任祠部司勳二郎中。各經六考。陛下之意。頗爲宜然。以臣蠢愚。實有偏見。凡徵舊例。須辨是非。是者不必渝。非者不必守。況於舊例之內。自有舛駁之異哉。先聖之初。權臣用事。其於除授。類多徇情。有一月屢遷。有積年不轉。迨至中歲。君臣構嫌。姑務優柔。百事疑滯。其於選授。尤所艱難。始以頗僻失平。繼以疑阻成否。至使

彝倫闕叙。庶位多淹。是皆可懲。曷足爲法。夫覈才馭吏。有三術焉。一曰拔擢以旌其異能。二曰黜罷以糾其失職。三曰序進以謹其守常。如此則高課者驟升。無庸者亟退。其餘績非出類。守不敗官。則循以常資。約以定限。故得殊才不滯。庶品有倫。參酌古今。此爲中道。而議者暗於通理。一槩但曰宜久其任。得非誦老生之常談。而不推時變者乎。夫列位分官。緝熙帝載。匪唯應務。兼亦養才。是以職事雖有。小大閑劇之殊。而

俱不可曠缺者。蓋備於時而用耳。故記曰天子以騶虞爲節樂官備也。唯經邦贊國之任。則非有盛德。不可以居。故記曰設四輔及三公。不必備。唯其人。議者昧於明徵。一槩但曰官無其人。則闕得非守舊典之糟粕。而不本事情者乎。今內外羣官。考深合轉。陛下或言其已有次第。須且借留。或謂其未著功勞。何用數改。是乃循默者。旣以無聞而不進。著課者。又有成績而見淹。雖能否或差。而沉滯無異。人之從宦。積小成高。

至於內列朝行。外登郡守。其於更歷。多已長年。孜孜慎修。計日思進。而又淹逾考限。亟易星霜。顧懷生涯。能不興歎。殊異登延之義。且乖勸勵之方。夫長吏數遷。固非理道。居官過久。亦有弊生。何者。時俗常情。樂新厭舊。有始卒者。其唯聖人。降及中才。罕能無變。其始也。砥礪之心。必切其久也。因循之意。必萌。加以盈無不虧。張無不弛。天地神化。且難常全。人之所爲。安得皆當。是以分分而度。至丈必差。銖銖而稱。至鈞必謬。莅



職旣久。寧無咎愆。或爲姦吏所持。或坐深文所  
糾。偶以一跌。盡隳前功。至使理行不終。能名中  
缺。豈非上失其制。而推致以及於斯乎。故聖人  
愛人之才。慮事之弊。採其英華而使之。當其茂  
暢而獎之。不滯人於已成之功。不致人於必敗  
之地。是以銳不挫而力不匱。官有業而事有終。  
此理之中庸。故書以爲法。遷轉甚速。則人心苟  
而職業不固。甚遲。則人心怠而事守浸衰。然則  
甚速與甚遲。其弊一也。陛下俯徇浮議。謂協典

武氏萬古  
罪人。而用  
人之長。公  
獨推之。

謨久次當進者。既曰務欲且留。缺員須補者。復  
曰官不必備。則才彥何由進。益理化孰與交修。  
此所謂循故事而不擇可否之患也。伏惟陛下  
憂勤務理。夢想思賢。體陶唐有虞聰明之德。以  
敷求。法太宗天后英邁之風。以拔擢。然而得人  
之盛。尚愧前朝。底乂之功。未光當代。良以七患  
未去。三術未行。而又睿察太深。宸嚴太峻。常人  
才器。曷副天心。故雖獲超昇。亦驟從黜廢。人物  
殘瘁。抑斯之由。而議者莫究致弊之端。但思革

弊之策。反以廣于進用爲情。故以梗于除授爲精詳。以避謗爲奉公之誠。以擿瑕爲選士之要。乃至稱毀紛揉。美惡混并。凡有遷升。必遭掎摭。聖德廣納。不時發明。小人多言。益敢陰詐。以是眩惑。目無全人。進用之意。轉疑汲引之塗。漸隘舊齒。旣凋。敗幾盡。下位或滯淹罕升。故令官序失倫。人才不長。資望漸薄。砥礪浸微。高卑等衰。殆不相續。臣以竊位。屬當序才。懼曠庶官。亟黷宸扆。昧識不足以周物。微誠不足以動天。徒勤

進善之心。轉積妨賢之罪。慙惶交慮。焚灼盈懷。凡除吏者。非謗刺之所生。必怨咎之所聚。宰臣獲戾。多起于茲。屢屢上干。何所爲利。但以待罪。鈞轄職思其憂。兼迫于感恩。願效之誠。不得不冒昧言之耳。其于裁擇用捨。惟陛下圖之。謹奏。

陸宣公集卷二十二

終



上三行公... 卷之... 下... 以... 人... 姓...

... 之... 以... 人... 姓...

... 之... 以... 人... 姓...

... 之... 以... 人... 姓...

... 之... 以... 人... 姓...

... 之... 以... 人... 姓...

... 之... 以... 人... 姓...

... 之... 以... 人... 姓...

... 之... 以... 人... 姓...

陸宣公奏草卷之二十三

均節賦稅恤百姓六條

其一論兩稅之弊須有釐革

國朝著令賦役之法有三一曰租二曰調三曰庸古者一井之地九夫共之公田在中藉而不稅私田不善則非吏公田不善則非民事頗纖微難於防檢春秋之際已不能行故國家襲其要而去其煩丁男一人授田百畝但歲納租粟二石而已言以公田假人而收其租入故謂之

春秋時已不能行而孟子必欲行于戰國是亦學古不變者

租古者任土之宜以奠賦法國家就因徃制簡而壹之每丁各隨鄉土所出歲輸若絹若綾若絁共二丈綿三兩其無蠶桑之處則輸布二丈五尺麻三斤以其據丁戶調而取之故謂之調古者用人之力歲不過三日後代多事其增十之國家斟酌物宜立爲中制每丁一歲定役二旬若不役則收其庸日準三尺以其出絹而當庸直故謂之庸此三道者皆宗本前哲之規模參考歷代之利害其取法也遠其立意也深其

歛財也均。其域人也固。其裁規也簡。其備慮也周。有田則有租。有家則有調。有身則有庸。天下爲家。法制均壹。雖欲轉徙。莫容其姦。故人無搖心而事有定制。以之厚生。則不隄防。而家業可久。以之成務。則不校閱。而衆寡可知。以之爲理。則法不煩。而教化行。以之成賦。則下不困。而上用足。三代創制。百王是程。雖維御損益之術。小殊。而其義一也。天寶季歲。羯胡亂華。海內波搖。兆庶雲擾。版圖墮於避地。賦法壞於奉軍。建中



之初再造百度。執事者知弊之宜革。而所作兼失其源。知簡之可從。而所操不得其要。舊患雖減。新沴復滋。救跛成痿。展轉增劇。凡欲拯其積弊。須窮致弊之由。時弊則但理其時。法弊則全革其法。而又揆新校舊。慮遠圖難。規略未詳。悉固不果行。利害非相懸。固不苟變。所爲必當。其悔乃亡。若好革而不知原始要終。斯皆以弊易弊者也。至如賦役舊法。乃是聖祖典章。行之百年。人以爲便。兵興之後。供億不常。乘急誅求。漸

極盡纖悉  
方是實才

隳經制。此所謂時之弊。非法弊也。時有弊而未  
理。法無弊而已。更掃庸調之成規。創兩稅之新  
制。立意且爽。彌綸又踈。竭耗編昨。日日滋甚。夫  
作法裕於人。未有不得人者也。作法裕於財。未  
有不失人者也。陛下初膺寶位。思致理平。誕發  
德音。哀痛流弊。念徵役之頻重。憫烝黎之困窮。  
分命使臣。敷揚惠化。誠宜損上益下。晉用節財。  
窒侈欲。以盪其貪風。息冗費。以紓其厚歛。而乃  
搜摘郡邑。劾驗簿書。每州各取大曆中一年科

率錢穀數最多者。便爲兩稅定額。此乃採非法之權。令以爲經制。總無名之暴賦。以立恒規。是務取財。豈云恤隱。作法而不以裕人。拯病爲本。得非立意且爽者乎。夫財之所生。必因人力。工而能勤。則豐富。拙而兼惰。則窶空。是以先王之制賦入也。必以丁夫爲本。無求於力分之外。無貨於力分之內。故不以務穡增其稅。不以輟稼減其租。則播種多。不以殖產厚其征。不以流寓免其調。則地利固。不以飾勵重其役。不以竄怠



蠲其庸則功力勤如是然後能使人安其居盡其力相觀而化時靡遁心雖有惰遊不率之人亦已懲矣兩稅之立則異於斯唯以資產爲宗不以丁身爲本資產少者則其稅少資產多者則其稅多曾不悟資產之中事情不一有藏於襟懷囊篋物雖貴而人莫能窺有積於場圃困倉直雖輕而衆以爲富有流通蕃息之貨數雖寡而計日收贏有廬舍器用之資價雖高而終歲無利如此之比其流實繁一槩計估算緡宜



其失平長僞。由是務輕費而樂轉徙者。恒脫於徭稅。敦本業而樹居產者。每困於徵求。此乃誘之爲姦。毆之避役。力用不得不弛。風俗不得不訛。閭井不得不殘。賦入不得不闕。復以剗制之首。不務齊平。但令本道本州。各依舊額徵稅。軍興已久。事例不常。供應有煩。簡之殊。牧守有能。否之異。所在徭賦。輕重相懸。旣成新規。須懲積弊。化之所在。足使無偏。減重分輕。是將均濟。而乃急於聚斂。懼或蠲除。不量物力所堪。唯以舊

額爲準。舊重之處。流亡益多。舊輕之鄉。歸附益衆。有流亡則已重者。攤徵轉重。有歸附則已輕者。散出轉輕。高下相傾。勢何能止。又以謀始之際。不立科條。分遣使臣。凡十餘輩。專行其意。各制一隅。遂使人殊見道。異法低昂不類。緩急不倫。逮至復命于朝。竟無類會裁處。其於躡駁。胡可勝言。利害相形。事尤非便。作法而不以究微防患爲慮。得非彌綸又踈者乎。立意且爽。彌綸又踈。凡厥疲人。已嬰其弊。就加保育。猶懼不支。

況復亟繚焚絲重傷宿痾其爲擾病抑又甚焉  
請爲陛下舉其尤者六七端則人之困窮固可  
知矣大曆中紀綱廢弛百事從權至於率稅少  
多皆在牧守裁制邦賦旣無定限有司懼有關  
供每至徵配之初例必廣張名數以備不時之  
命且爲施惠之資應用有餘則遂減放增損旣  
由郡邑消息易協物宜故法雖久利而人未甚  
瘁及總雜徵虛數以爲兩稅恒規悉登地官咸  
繫經費計奏一定有加無除此則人益困窮其



事一也。本懲賦歛繁重。所以變舊從新。新法旣行。已重於舊。旋屬征討。國用不克。復以供軍爲名。每貫加徵二百。當道或增戎旅。又許量事取資。詔勅皆謂權宜。悉令事畢。停罷息兵。已久。加稅如初。此則人益困窮。其事二也。定稅之數。皆計緡錢。納稅之時。多配綾絹。往者納絹一疋。當錢三千二三百文。今者納絹一疋。當錢一千五六百文。往輸其一者。今過於二矣。雖官非增賦。而私已倍輸。此則人益困窮。其事三也。諸州稅



公一味推  
誠而于奸  
猾鬼秘洞  
悉如此惜  
手不盡其  
用

物。送至上都。度支頒給羣司。例皆增長本價。而  
又繆稱折估。抑使剝微。姦吏因緣。得行侵奪。所  
獲殊寡。所擾殊多。此則人益困窮。其事四也。稅  
法之重。若是。既於已極之中。而復有奉進。宣索  
之繁。尚在其外。方岳頗拘於成例。莫敢闕供朝  
典。又束以彛章。不許別稅。綺麗之飾。紈素之饒。  
非從地生。非自天降。若不出編戶之筋力。膏髓。  
將安所取哉。於是。有巧避微文。曲成睿旨。徵  
役以召僱之目。換科配以和市之名。廣其課而

狹償其庸。精其入而麓計其直。以召僱爲目。而捕之不得。不來。以和市爲名。而迫之不得。不出。其爲妨抑。特甚常徭。此則人益困窮。其事五也。大曆中。非法賦歛。急備供軍。折估宣索。進奉之類者。旣竝收入兩稅矣。今於兩稅之外。非法之事。復又竝存。此則人益困窮。其事六也。建中定稅之始。諸道已不均齊。其後或吏理失宜。或兵賦偏重。或癘疾鍾害。或水旱荐災。田里荒蕪。戶口減耗。牧守苟避於殿責。罕盡申聞。所司姑務

於取求。莫肯矜恤。遂於逃歿。闕乏。稅額累加。見  
在疲甿。一室已空。四鄰旣盡。漸行增廣。何由自  
存。此則人益困窮。其事七也。自至德迄于大曆。  
二十年餘。兵亂相乘。海內罷弊。幸遇陛下紹膺  
寶運。憂濟生靈。誕敷聖謨。痛矯前弊。垂愛人節。  
用之旨。宣輕徭薄賦之言。率土烝黎。感涕相賀。  
延頸企踵。咸以謂太平可期。旣而制失其中。歛  
從其重。頗乖始望。已沮群心。因之以兵甲。而煩  
暴之取。轉加。繼之以獻求。而靜約之風。浸靡。臣



所知者。纔梗槩耳。而人益困窮之事。已有七焉。臣所不知。何啻於此。陛下儻追思大曆中。所聞人間疾苦。而又有此七事。重增於前。則人之無聊。不問可悉。昔魯哀公問於有若曰。年饑用不足。如之何。有若對曰。盍徹乎。哀公曰。二吾猶不足。如之何其徹也。有若曰。百姓足。君孰與不足。百姓不足。君孰與足。孔子曰。有國有家者。不患寡而患不均。不患貧而患不安。蓋均而無怨。節而無貧。和而無寡。安而無傾。漢文恤患救災。則



命郡國無來獻。是以人爲本。以財爲末。人安則財贍。本固則邦寧。今百姓艱窮。非止不足。稅額類例。非止不均。求取繁多。非止來獻誠可哀憫。亦可憂危。此而不圖。何者爲急。聖情重慎。每戒作爲。伏知貴欲因循。不敢盡求釐革。且去其太甚。亦足小休。望令所司與宰臣參量。據每年支用色目中。有不急者。無益者。罷廢之。有過制者。廣費者。減節之。遂以罷減之資。迴給要切之用。其百姓稅錢。頃因軍興。每貫加徵二百者。下詔

停之用。復其言。俾人知信。下之化。上不令而行。諸道權宜加徵。亦當自請蠲放。如是。則困窮之中。十緩其二三矣。供御之物。各有典司。任土之儀。各有常貢。過此以往。復何所須。假欲崇飾燕居。儲備賜與。天子之貴。寧憂乏財。但勅有司。何求不給。豈必旁延進獻。別徇營求。減德示私。傷風敗法。因依縱擾。爲害最深。陛下臨御之初。已弘清淨之化。下無曲獻。上絕私求。近歲已來。稍渝前旨。今但滌除流誤。振起聖猷。則淳風再興。

賄道中寢。雖有貪饕之輩。曷由復肆侵漁。州郡  
羨財。亦將焉往。若不上輸王府。理須下紓疲人。  
如是。則困窮之中。十又緩其四五矣。所定稅物  
估價。合依當處月中。百姓輸納之時。累經州縣  
簡閱。事或涉於姦冒。過則不在戶人。重重剝徵。  
理甚無謂。望令所司。應諸州府送稅物到京。但  
與色樣相符。不得虛稱折估。如濫惡尤甚。給用  
不充。唯罪元納官司。亦勿更征百姓。根本既自  
端靜。枝葉無因動搖。如是。則困窮之中。十又緩

其二三矣。然後據每年見供賦稅之處。詳諭詔旨。咸俾均平。每道各令知兩稅判官一人赴京。與度支類會參定。通計戶數。以配稅錢。輕重之間。大約可準。而又量土地之沃瘠。計物產之多少。倫比諸州。定爲兩等。州等下者。其每戶配錢之數少。州等高者。其每戶配錢之數多。多少已差。悉令折衷。仍委觀察使。更於當管所配錢數之內。均融處置。務盡事宜。就於一管之中。輕重不得偏併。雖或未盡齊一。決當不甚低昂。旣免



擾人。且不變法。粗均勞逸。足救凋殘。非但徵賦  
易供。亦冀逋逃漸息。俟稍寧阜。更擇所宜。

○○其二請兩稅以布帛爲額不計錢數

夫國家之制賦稅也必先道以厚生之業而後取其什一焉其所取也量人之力任土之宜非力之所出則不征非土之所有則不貢謂之通法歷代常行大凡生於天地之間而五材之用爲急五材者金木水火土也水火不資於作爲金木自產於山澤唯土爰播植非力不成衣食之源皆出於此故可以勉人功而定賦入者唯布麻繒纊與百穀焉先王懼物之貴賤失平而

又想不到

公之理財  
用人如工  
者造器有  
定規有成  
形

人之交易難准。又立貨泉之法，以節輕重之宜。歛散弛張，必由於是。蓋御財之大柄，為國之利。權守之在官，不以任下。然則穀帛者，人之所為也。錢貨者，官之所為也。人之所為者，故租稅取焉。官之所為者，故賦歛捨焉。此又事理著明者也。是以國朝著令，稽古作程，所取於人，不踰其分。租出穀庸，出絹調雜，出繒纊布麻，非此族也。不在賦法。列聖遺典，粲然可徵。曷嘗有禁人鑄錢，而以錢為賦者也。今之兩稅，獨異舊章，違任

土之通方。效算緡之末法。不稽事理。不揆人功。但估資產爲差。便以錢穀定稅。臨時折徵雜物。每歲色目頗殊。唯計求得之利宜。靡論供辦之難易。所徵非所業。所業非所徵。遂或增價以買。其所無減價以賣。其所有一增一減。耗損已多。且百姓所營。唯在耕織。人力之作爲有限。物價之貴賤無常。而乃定稅計錢折錢納物。是將有。畝之產以奉無常之輸。納物賤則供稅之所出。漸多。多則人力不給。納物貴則收稅之所入漸。



小人言利  
不權利病  
徃徃如是

少○少○則○國○用○不○克○公○私○二○途○常○不○兼○濟○以○此○爲○  
法○未○之○前○聞○徃○者○初○定○兩○稅○之○時○百○姓○納○稅○一○  
疋○折○錢○三○千○二○三○百○文○大○率○萬○錢○爲○絹○三○疋○價○  
旣○稍○貴○數○則○不○多○及○乎○頒○給○軍○裝○計○數○而○不○計○  
價○此○所○謂○稅○入○少○而○國○用○不○克○者○也○近○者○百○姓○  
納○絹○一○疋○折○錢○一○千○五○六○百○文○大○率○萬○錢○爲○絹○  
六○疋○價○旣○轉○賤○數○則○漸○加○向○之○蠶○織○不○殊○而○所○  
輸○尚○欲○過○倍○此○所○謂○供○稅○多○而○人○力○不○給○者○也○  
今○欲○不○甚○改○法○而○粗○救○災○害○者○在○乎○約○循○典○制○

而以時變損益之。臣謂宜令所司勘會諸州府  
初納兩稅年絹布定估比類。當今時價加賤減  
貴。酌取其中。總計合稅之錢。折爲布帛之數。仍  
依庸調舊制。各隨鄉土所宜。某州某年定出稅  
布若干端。某州某年定出稅絹若干疋。其有絲  
綿雜貨。亦隨所出定名。勿更計錢。以爲稅數。如  
此。則上有常制。人有常輸。衆皆知上令之不遷。  
於是一其心而專其業。應出布麻者。則務於紡  
績。供綿絹者。則事於蠶桑。日作月營。自然便習。

因之一字  
理財用人  
之訣

心手雙暢

各修家技。皆足供官。無求人假手之勞。無賤鬻  
貴買之費。無暴徵急辦之弊。無易常變作之煩。  
物甚賤而人之所出。不加物甚貴而官之所入。  
不減。是以家給而國足。事均而法行。此直稍循  
令典之舊規。固非創制之可疑者也。然蚩蚩之  
俗。罕究事情。好騁異端。妄行沮議。臣請假爲問  
答。以備討論。陛下誠有意乎憐愍蒼生。將務救  
恤。但垂聽覽。必有可行。議者若曰。每歲經費所  
資。大抵皆約錢數。若今以布帛爲額。是令支計



無憑答曰國初約法已來常賦率由布帛輸二  
甲子制用不愆何獨當今則難支計且經費之  
大其流有三軍食一也軍衣二也內外官月俸  
及諸色資課三也軍衣固在於布帛軍食又取  
於地租其計錢爲數者獨月俸資課而已制祿  
唯不計錢故三代以食人衆寡爲差兩漢以石  
數多少爲秩蓋以錢者官府之權貨祿者吏屬  
之常資以常徇權則豐約之度不得恒於家以  
權爲常則輕重之柄不得專於國故先王制祿



以食而平貨以錢。然後國有權而家有節矣。況  
今餽餉方廣。倉儲未豐。盡復古規。或慮不足。若  
但據羣官月俸之等。隨百役資課之差。各依錢  
數多少。折爲布帛定數。某官月給俸絹若干疋。  
某役月給資布若干端。所給色目精粗。有司明  
立條例。便爲恒制。更不計錢。物甚賤而官之所  
給不加。物甚貴而私之所稟不減。官私有準。何  
利如之。生人大端。衣食爲切。有職田以供食。有  
俸絹以供衣。從事之家。固足自給。以茲制事。謹

曰不然。夫然則國之用財多是布帛。定以爲賦。復何所傷。議者若曰。吏祿軍裝。雖頒布粟。至於以時歛糴。用權物價重輕。是必須錢。於何取給。答曰。古之聖人。所以取山澤之蘊材。作泉布之寶貨。國專其利。而不與人共之者。蓋爲此也。物賤由乎錢少。少則重重。則加鑄而散之。使輕物貴。由乎錢多。多則輕輕。則作法而歛之。使重。是乃物之貴賤。繫於錢之多少。錢之多少。在於官中盈縮。官失其守。反求於人。人不得鑄錢而限。

令共稅。是使貧者破產。而假資於富有之室。富者蓄貨。而竊行於輕重之權。下困齊人。上虧利柄。今之所病。諒在於斯。誠宜廣卽山殖貨之功。峻用銅爲器之禁。苟制持得所。則錢不乏矣。有糶鹽以入其直。有榷酒以納其資。苟消息合宜。則錢可收矣。錢可收。固可以斂輕爲重。錢不乏。固可以散重爲輕。弛張在官。何所不可。慮無所給。是未知方。議者若曰。自定兩稅以來。恒使計錢納物。物價漸賤。所納漸多。出給之時。又增虛



估。廣。求。羨。利。以。贍。庫。錢。歲。計。月。支。猶。患。不。足。今  
若。定。供。布。帛。出。納。以。平。軍。國。之。資。無。乃。有。闕。答  
曰。自。天。寶。以。後。師。旅。數。起。法。度。消。亡。肅。宗。撥。陷  
天。之。災。而。急。於。功。賞。先。帝。邁。含。垢。之。德。而。緩。於  
糾。繩。由。是。用。頗。殷。繁。俗。亦。靡。弊。公。賦。已。重。別。獻  
繼。興。別。獻。既。行。私。賂。競。長。誅。求。刻。剝。日。長。月。滋  
積。累。以。至。于。大。曆。之。間。所。謂。取。之。極。甚。者。也。今  
既。總。收。極。甚。之。數。定。爲。兩。稅。矣。所。定。別。獻。之。類  
復。在。數。外。矣。間。緣。軍。用。不。給。已。嘗。加。徵。矣。近。屬



折納價錢。則又多獲矣。比於大曆極甚之數。殆將再益其倍焉。復幸年穀屢豐。兵車少息。而用常不足。其故何哉。蓋以事逐情生。費從事廣。物有劑。而用無節。夫安得不乏乎。苟能黜其情。約其用。非但可以布帛爲稅。雖更減其稅。亦可矣。苟務逞其情。侈其用。非但行今重稅之不足。雖更加其稅。亦不足也。夫地力之生物。有大數。人力之成物。有大限。取之有度。用之有節。則常足。取之無度。用之無節。則常不足。生物之豐。敗由

從古如斯

天用物之多少由人。是以聖王立程。量入爲出。雖遇災難。下無困窮。理化旣衰。則乃反是。量出爲入。不恤所無。故魯哀公問年饑。用不足。如之何。有若對以盍徹。桀用天下而不足。湯用七十里而有餘。是乃用之盈。虛在於節。與不節耳。不節則雖盈必竭。能節則雖虛必盈。衛文公承滅國之餘。建新徙之業。革車不過三十乘。豈不甚殆哉。而能衣大布冠。大帛約。已率下通商務。農卒以富强見稱。載籍漢文帝接秦項積久傷夷。

快讀一過  
如遊蓬閣  
之間

之弊繼高呂革創多事之時家國虛殘日不暇  
給而能躬儉節用靜事息人服曳綈履革鳥却  
駿馬而不御罷露臺而不修屢賜田租以厚丞  
庶遂使戶口蕃息百物阜殷乃至鄉曲宴遊乘  
牝犗者不得赴會子孫生長或有積數十歲不  
識市鄽御府之錢貫朽而不可校太倉之粟紅  
腐而不可食國富於上人安於下生享遐福沒  
垂令名人到于今稱其仁賢可謂盛矣太宗文  
皇帝收合版蕩再造寰區武德年中革車屢動



繼○以○災○歉○人○多○流○離○貞○觀○之○初○荐○屬○霜○早○自○關○  
輔○綿○及○三○河○之○地○米○價○騰○貴○斗○易○一○縑○道○路○之○  
間○餒○殍○相○藉○太○宗○敦○行○儉○約○撫○養○困○窮○視○人○如○  
傷○勞○俸○不○倦○百○姓○有○鬻○男○女○者○出○御○府○金○帛○贖○  
還○其○家○嚴○禁○貪○殘○慎○節○徭○賦○弛○不○急○之○用○省○無○  
事○之○官○黜○損○乘○輿○斥○出○宮○女○太○宗○嘗○有○氣○疾○百○  
官○以○大○內○卑○濕○請○營○一○閣○以○居○尚○憚○煩○勞○竟○不○  
之○許○是○以○至○誠○上○感○淳○化○下○敷○四○方○大○和○百○穀○  
連○稔○貞○觀○八○年○以○後○米○斗○至○四○五○錢○俗○阜○化○行○



人。知。義。讓。行。旅。萬。里。或。不。齎。糧。故。人。到。于。今。談。  
帝。王。之。盛。則。必。先。太。宗。之。聖。功。論。理。道。之。崇。則。  
必。慕。貞。觀。之。故。事。此。二。君。者。其。經。始。豈。不。艱。窘。  
哉。皆。以。嗇。用。愛。人。竟。獲。豐。福。是。所。謂。能。節。雖。虛。  
必。盈。之。効。也。秦。始。皇。據。嶠。函。之。固。藉。雄。富。之。業。  
專。力。農。戰。廣。收。材。豪。故。能。芟。滅。暴。強。宰。制。天。下。  
功。成。志。滿。自。謂。有。泰。山。之。安。貪。欲。熾。然。以。爲。六。  
合。莫。予。違。也。於。是。發。閭。左。之。戍。徵。太。半。之。賦。進。  
諫。者。謂。之。宣。謗。恤。隱。者。謂。之。收。恩。故。徵。發。未。終。

而宗社已泯。漢武帝遇時運理平之會。承文景  
勤儉之積。內廣興作。外張甲兵。侈汰無窮。遂至  
殫竭。大搜財貨。算及舟車。遠近騷然。幾至顛覆。  
賴武帝英姿大度。付任以能。納諫無疑。改過不  
吝。下哀痛之詔。罷征伐之勞。封丞相爲富民侯。  
以示休息。邦本搖而復定。帝祚危而再安。隋氏  
因周室平齊之資。府庫克實。開皇之際。理尚廉  
平。是時公私豐饒。議者以比漢之文景。煬帝嗣  
位。肆行驕奢。竭耗生靈。不知止息。海內怨叛。以

至於亡此三君者其所憑藉豈不豐厚哉此皆以縱欲殘人竟致蹙喪是所謂不節則雖盈必竭之效也秦隋不悟而遂滅漢武中悔而獲存乃知懲與不懲覺與不覺其於得失相遠復有存滅之殊安可不思安可不懼今人窮日甚國用歲加不時節量其勢必蹙而議者但憂財利之不足罔慮安危之不持若然者則太宗漢文之德曷見稱秦皇隋煬之敗靡足戒唯欲是逞復何規哉幸屬休明將期致理急聚歛而忽於

勤恤固非聖代之所宜言也。

廿





漢宣良法  
悉爲唐德  
病源令人  
投筆而嘆

左國風神

○ ○ 其三論長吏以增戶加稅闢田爲課績  
夫欲施教化立度程必先域人使之地著古之  
王者設井田之法以安其業立五宗之制以綴  
其恩猶懼其未也又教之族墳墓敬桑梓將以  
固人之志定人之居俾皆重遷然可爲理厥後  
又督之以出鄉遊惰之禁糾之以版圖比閱之  
方雖訓導漸微而檢制猶密歷代因襲以爲彝  
章其理也必謹於隄防其亂也必慢於經界斯  
道崇替與時興衰人主失之則不可御寰區守

戶口歲增  
本善治也  
而其弊至  
此天下事  
總壞于小  
人小人之  
病又成于  
朝廷不明

長失之。則不可釐郡邑。理人之要。莫急於茲。頃  
因兵興。典制弛廢。戶版之紀。綱罔緝。土斷之條。  
約不明。恣人浮流。莫克禁止。從之則湊。集整之。  
則驚離。恒懷倖心。靡固本業。是以賦稅不一。教  
令不行。長人者。又罕能推忠恕。易地之情。體至  
公。徇國之意。迭行小惠。競誘姦。昨以傾奪鄰境。  
為智能。以招萃逋逃。為理化。捨彼適此者。既謂  
新收。而獲宥。倏忽往來者。又以復業。而見優。唯  
懷土安居。首末不遷者。則使之日重。歛之日加。



見之透而  
言之精無  
如此老

是令地著之人恒代墮遊服役則何異驅之轉徙教之澆訛此由牧宰不克弘通各私所部之過也及夫廉使奏課會府考功但守常規不稽時變其所以爲長吏之能者大約在於四科一曰戶口增加二曰田野墾闢三曰稅錢長數四曰徵辦先期此四者誠吏職之所崇然立法齊人久無不弊法之所沮則人飾巧而苟避其網法之所勸則人興僞以曲附其文理之者若不

知維御損益之宜則巧僞萌生恒因沮勸而



天下之事  
豈可苟且  
爲之

矣。夫課吏之法。所貴戶口增加者。豈不以撫字  
得所。入益阜蕃乎。今或詭情以誘其姦。浮苛法  
以析其親族。苟益戶數。務登賞條。所誘者將議  
薄征。已遽驚散。所析者不勝重稅。又漸流亡。州  
縣破傷。多起於此。長吏相效。以爲績安。忍莫懲  
齊人相扇。以成風規。避轉甚不究實。而務增戶  
口。有如是之病焉。所貴田野墾闢。豈不以訓  
導有術。人皆樂業乎。今或牽率黎烝。播植荒廢。  
約以年限。免其地租。苟農夫不增。而墾田欲廣。

事必慮終  
識高計遠

新。畝。雖。闢。舊。畝。反。蕪。人。利。免。租。頗。亦。從。令。年。限。  
纔。滿。復。爲。污。萊。有。益。煩。勞。無。增。稼。穡。不。度。力。而。  
務。闢。田。野。有。如。是。之。病。焉。所。貴。稅。錢。長。數。者。豈。  
不。以。旣。庶。而。富。人。可。加。賦。乎。今。或。重。困。疲。羸。力。  
求。附。益。捶。骨。瀝。髓。隳。家。取。材。苟。媚。聚。歛。之。司。以。  
爲。仕。進。之。路。不。恤。人。而。務。長。稅。數。有。如。是。之。病。  
焉。所。貴。徵。辦。先。期。者。豈。不。以。物。力。優。贍。人。皆。樂。  
輸。乎。今。或。肆。毒。作。威。殘。人。逞。欲。事。有。常。限。因。而。  
促。之。不。量。時。宜。唯。尚。強。濟。絲。不。容。織。粟。不。暇。春。

矧伊貧虛能不奔迸不怨物而務先徵辦有如  
是之病焉然則引人逋逃蹙人艱窘唯茲四病  
亦有助焉此由考覈不切事情而泛循舊轍之  
過也且夫戶口增加田野墾闢稅錢長數徵辦  
先期若不以實事驗之則真僞莫得而辨將驗  
之以實則租賦須加所加既出於人固有受其  
損者此州若增客戶彼郡必減居人增處邀賞  
而稅數有加減處懼罪而稅數不降儻國家所  
設考課之法必欲崇於聚斂則如斯可矣將有



通變之法  
堯舜所貴  
豈有執定  
必本而可  
成治者安  
民足國萬  
世不改豈  
有剝民奉  
上而世不  
亂者

孝宜有言  
與吾共此  
者其良有  
司乎然此  
法不立何

意乎富俗而務理豈不刺謬歟當今之要在於  
厚人而薄財損上以益下下苟利矣上必安焉  
則少損者所以招大益也人既厚矣財必贍焉  
則斲薄者所以成永厚也臣愚謂宜申命有司  
詳定考績往貴於加者今務於減焉假如一州  
之中所稅舊有定額凡管幾許百姓復作幾等  
差科每等有若干戶人每戶出若干稅物各令  
條舉都數年別一申使司使司詳覆有憑然後  
錄報戶部若當管之內人益阜殷所定稅額有



以辨有司  
之良否

餘任其據戶均減率計減數多少以爲考課等  
差其當管稅物通比較每戶十分減三分者爲  
上課十分減二分者次焉十分減一分者又次  
焉如或人多流亡加稅見戶比較殿罰法亦如  
之其百姓所出田租常賦則各以去年應輸之  
數便爲定額每歲據額徵納更不勘責檢巡增  
闢者勿益其租廢耕者不降其數足以誘導墾  
益且免妨奪農功事簡體弘人必悅勸每至定  
戶之際但據雜產校量田旣自有恒租不宜更

入兩稅。如此則吏無苟且。俗變澆浮。不督課而人自樂耕。不防閑而衆皆安土。斯亦當今富人固本之要術。在陛下舉而行之。

三

...

...

...

...

...

...

...

...

...

通讀公集

無一字不

爲民請命

君者真衆

人之母也

其四論稅期限迫促

建官立國。所以養人也。賦人取財。所以資國也。明君不厚其所資。而害其所養。故必先人事。而借其暇力。先家給而歛其餘財。遂人所營。恤人所乏。借必以度。歛必以時。有度則忘勞。得時則易給。是以官事無闕。人力不殫。公私相全。上下交愛。古之得衆者。其率用此歟。法制或虧。本末倒置。但務取人以資國。不思立國以養人。非獨徭賦繁多。負無蠲貸。至於徵收迫促。亦不矜量。



末世情事  
如見如回

蠶事方興已。輸縑稅農功未艾。遽歛穀租。上司之繩責既嚴。下吏之威暴愈促。有者急賣而耗其半。直無者求假而費其倍。酬所繫遲速之間。不過月旬之異。一寬稅限。歲歲相承。遲無所妨。速不爲益。何急敦逼。重傷疲人。頃緣定稅之初。期約未甚詳悉。旋屬征役多故。復令先限量徵。近雖優延。尚未均濟。望委轉運使與諸道觀察。使商議更詳定徵稅期限。聞奏各隨當土風俗所便。時候所宜。務於紓人。俾得辦集。所謂惠而

不費者則此類也

天德寺中興道藏書

其五請以稅茶錢置義倉以備水旱

臣聞仁君在上則海內無餓殍之人豈必耕而  
餉之爨而食之哉蓋以慮得其宜制得其道致  
人於歉乏之外設備於災沴之前是以年雖大  
殺衆不恇懼夫水旱爲敗堯湯被之矣陰陽相  
寇聖何禦哉所貴堯湯之盛者在於遭患能濟  
耳凡厥哲后皆謹循之故王制記虞夏殷周四  
代之法乃云國無九年之蓄曰不足無六年之  
蓄曰急無三年之蓄曰國非其國也周官司徒

今人讀之  
可增危慮



之屬亦云掌鄰里之委積以恤艱阨縣鄙之委積以待凶荒王制旣衰雜以權術魏用平糴之法漢置常平之倉利兼公私頗亦爲便隋氏立制始創社倉終於開皇人不飢饉貞觀初戴胄建積穀備災之議太宗悅焉因命有司詳立條制所在貯粟號爲義倉豐則歛藏歉則散給歷高宗之代五六十載人賴其資國步中艱斯制亦弛開元之際漸復修崇是知儲積備災聖王之急務也語曰百姓足君孰與不足百姓不足

君孰與足。此言君養人以成國。人戴君以成生。上下相成。事如一體。然則古稱九年六年之蓄者。蓋率土臣庶通爲之計耳。固非獨豐公庾。不及編氓。記所謂雖有凶旱水溢。人無菜色。良以此也。後代失典籍。備慮之旨。忘先王子愛之心。所蓄糧儲。唯計廩庾。犬彘厭人之食。而不知檢溝壑。委人之骨。而不能恤。亂興於下。禍延於上。雖有公粟。豈得而食。諸故立國而不先養人。國固不立矣。養人而不先足。食人固不養矣。足食

而不先備災食固不足矣。爲官而備者，人必不  
贍。爲人而備者，官必不窮。是故論德昏明在乎  
所務，本末務本則其末自遂，務末則其本兼亡。  
國本於人，安得不務。頃以寇戎爲梗，師旅亟興，  
惠恤之方，多所未暇。每遇陰陽愆候，年不順成，  
官司所儲，祇給軍食。支計苟有所闕，猶須更取  
於人人之凶荒，豈遑賑救人。小乏則求取息利，  
人大乏則賣鬻田廬。幸逢有年，纔償逋債，歛穫  
始畢，糒糧已通。執契檐囊，行復貸假，重重計息。



食每不克，儻遇荐飢，遂至顛沛，室家相棄，骨肉  
分離，乞爲奴僕，猶莫之售，或行丐鄽里，或縊死  
道途，天災流行，四方代有，率計被其害者，每歲  
常不下一二十州，以陛下爲人父母之心，若垂  
省憂，固足傷惻，幸有可救乏之道，焉可捨而不  
念哉！今賦役已繁，人力已竭，窮歲汲汲，永無贏  
餘，課之聚斂，終不能致，將樹儲蓄根本，必藉官  
司助成，陛下誠能爲人備災，過聽愚計，不害經  
費，可垂永圖，近者有司奏請稅茶，歲約得五十



萬貫元勅令貯戶部用救百姓凶饑今以蓄糧  
適副前旨望令轉運使總計諸道戶口多少每  
年所得稅茶錢使均融分配各令當道巡院主  
掌每主穀麥熟時即與觀察使計會散就管內  
州縣和糴便於當處置倉收納每州令錄事參  
軍專知仍定觀察判官一人與和糴巡院官同  
勾當亦以義倉爲名除賑給百姓已外一切不  
得貸便支用如時當大稔事至傷農則優與價  
錢廣其糴數穀若稍貴糴亦便停所糴少多與

此法一行  
可塞百流

命于烏鳶

豺狼之口

矣

年上下准平穀價恒使得中每遇災荒即以賑  
給小歉則隨事借貸大饑則錄奏分頒許從便  
宜務使周濟循環歛散遂以爲常如此則蓄財  
息債者不能耗吾人聚穀幸災者無以牟大利  
富不至侈貧不至饑農不至傷糴不至貴一舉  
事而衆美具可不務乎俟人小休漸勸私積平  
糴之法斯在社倉之制兼行不出十年之中必  
盈三歲之蓄弘長不已升平可期使一代黎人  
永無餒乏此堯湯所以見稱於千古也願陛下

遵之慕之繼之齊之苟能存誠蔑有不至

其六論兼并之家私歛重於公稅

國之紀綱在於制度。商農工賈各有所專。凡在食祿之家不得與人爭利。此王者所以節材力。勵廉隅。是古今之所同。不可得而變革者也。代理則其道存而不犯。代亂則其制委而不行。其道存則貴賤有章。豐殺有度。車服田宅莫敢僭踰。雖積貨財無所施設。是以咸安其分。罕徇貪求。藏不偏多。故物不偏罄。用不偏厚。故人不偏窮。聖王能使禮讓興行。而財用均足。則此道也。



其制委則法度不守教化不從唯貨是崇唯力  
是騁貨力苟備無欲不成租販兼并下錮齊人  
之業奉養豐麗上侔王者之尊戶蓄羣黎隸役  
同輩既濟嗜欲不虞憲章肆其貪恡曷有紀極  
天下之物有限富室之積無涯養一人而費百  
人之資則百人之食不得不乏富一家而傾千  
室之產則千家之業不得不空舉類推之則海  
內空乏之流亦已多矣故前代致有風俗訛靡  
阡廛困窮由此弊也今茲之弊則又甚焉夫物

之不可掩藏而易以閱視者莫著乎田宅臣請  
又措其宅而勿議且舉占田一事以言之古先  
哲王彊理天下百畝之地號曰一夫蓋以一夫  
授田不得過於百畝也欲使人無廢業田無曠  
耕人力田疇二者適足是以貧弱不至竭涸富  
厚不至奢淫法立事均斯謂制度今制度弛紊  
彊理隳壞恣人相吞無復畔限富者兼地數萬  
畝貧者無容足之居依託強豪以爲私屬貸其  
種食賃其田廬終年服勞無日休息罄輸所假

今更甚矣

常患不克有田之家坐食租稅貧富懸絕乃至  
於斯厚歛促徵皆甚公賦今京畿之內每田一  
畝官稅五升而私家收租殆有畝至一石者是  
二十倍於官稅也降及中等租猶半之是十倍  
於官稅也夫以土地王者之所有耕稼農夫之  
所爲而兼并之徒居然受利官取其一私取其  
十穡人安得足食公廩安得廣儲風俗安得不  
貪財貨安得不壅昔之爲理者所以明制度而  
謹經界豈虛設哉斯道浸亡爲日已久頓欲修

此弊不可

華矣宜稍

有以均之



整行之實難。革弊化人，事當有漸。望令百官集議，參酌古今之宜。凡所占田，約爲條限，裁減租價，務利貧人。法貴必行，不在深刻。裕其制，以便俗。嚴其令，以懲違。微損有餘，稍優不足。損不失富，優可賑窮。此乃古者安富恤窮之善經，不可捨也。





右臣前月十一日、延英奏對、因敘賦稅煩重、百姓困窮、伏奉恩旨、令具條疏聞奏、今且舉其甚者、謹件如前、臣聞於書曰、無輕人事、惟難、無安厥位、惟危、此理之所以興也、又曰、厥後嗣王、生則逸、不知稼穡之艱難、此亂之所由始也、以陛下天縱聖哲、事更憂危、夙夜孜孜、志求致理、往年論及百姓、必爲悽然動容、每言朕於蒼生、肢體亦無所惜、臣久叨近侍、亟奉德音、竊謂一代黔黎、必躋富壽之域、昨奏人間疾苦、十分纔及

二三聖情已甚驚疑。皆謂臣言過當。然則愁怨之事。何由上聞。煦育之恩。何由下布。典籍所戒。信而有徵。一虧聖猷。實可深惜。臣又聞於書曰。非知之艱。行之惟艱。竊惟陛下所以驚疑於微臣之言者。但聞之未熟耳。此乃股肱耳目之任。仰負於陛下。誠所謂知之非艱。尚未足深累聖德也。今則既知之矣。願陛下勿復艱於所行。居安思危。億兆幸甚。謹奏。

陸宣公奏草卷之二十三

終

公之在朝  
自以不恤  
其身知無  
不言言無  
不盡觀此  
信然

陸宣公奏草卷之二十四

論裴延齡姦蠹書一首

十一年三月具官臣某惶恐頓首獻書皇帝陛下  
下臣聞君子小人用捨不並國家否泰恒必由  
之君子道長小人道消於是上下交而萬物通  
此所以爲泰也小人道長君子道消於是上下  
不交而萬物不通此所以爲否也夫小人之蔽  
明害理如目之有眇耳之有克嘉穀之有蠹梁  
木之有蠹也眇離婁之目則天地四方之位不



分矣。克子野之耳。則雷霆蠅黽之聲莫辨矣。雖  
后稷之穡禾易長。畝而蝨傷其本。則零瘁而不  
植矣。雖公輸之巧臺成九層。而蠹空其中。則圯  
折而不支矣。是以古先聖哲之立言垂訓。必殷  
勤切至。以小人爲戒者。豈將有意讐而沮之哉。  
誠以其蔽主之明。害時之理。致禍之源。博傷善  
之釁深。所以有國有家者。不得不去耳。其在周  
易。則曰大君有命。開國承家。小人勿用。必亂邦  
也。在尚書。則曰除惡務本。去邪勿疑。在毛詩。則

曰無縱詭隨，以謹無良。曾是捨克，歛怨以爲德。盜言孔甘，亂是用餒。讒人罔極，交亂四國。在論語，則曰惡利口之覆邦家者。在春秋，則曰聚歛積實，不知紀極，毀信廢忠，崇飾惡言，靖譖庸回，服讒蒐慝。天下之人，謂之四凶。在禮記，則曰小人行險以僥倖，長國家而務財用者，必自小人矣。小人使爲國家，而災害並至，雖有善人，無如之何。臣頃因讀書，常憤此類，不圖聖代，目覩斯人。戶部侍郎裴延齡者，其性邪，其行險，其口利。

其志凶其矯妄不疑其敗亂無耻以聚斂爲長  
策以詭妄爲嘉謀以培克斂怨爲匪躬以靖譖  
服讒爲盡節總典籍之所惡以爲智術冒聖哲  
之所戒以爲行能可謂堯代之共工魯邦之少  
卵伏惟陛下協放勲文思之德而鑒其方鳩儻  
功體仲尼天縱之明而辨其順非堅僞則天討  
斯得聖化允孚小往大來孰不欣幸跡其姦蠹  
日長月滋陰祕者固未盡彰敗露者猶難悉數  
今請粗舉數事用明欺罔大端悉非隱微皆可

覆驗陛下若意其負謫則誠宜亟爲辨明陛下  
若知其無良又安可曲加容掩願擇左右親信  
兼與舉朝公卿據臣所言閱實其事儻延齡罪  
惡無狀卽臣之奏議是誣宜申典刑以制虛妄  
俾四海法朝廷之理兆人戴陛下之明得失之  
間其體甚大不當復有疑慮使辨之不早以竟  
失天下之望也前歲秋首班宏喪亡特詔延齡  
繼司邦賦數月之內遽衛功能奏稱勾獲隱欺  
計錢二十萬貫請貯別庫以爲羨財供御所須



永無匱乏。陛下欣然信納，因謂委任得人，既賴  
贏餘之資，稍弘心意之欲，興作浸廣，宣索漸多，  
延齡務實前言，且希睿旨，不敢告闕，不敢辭難，  
勾獲既是虛言，無以應命，供辦皆承嚴約，苟在  
及期，遂乃搜求市鄽，豪奪入獻，追捕夫匠，迫脅  
就功，以敕索爲名，而不酬其直，以和雇爲稱，而  
不償其傭，都城之中，列肆爲之晝閉，興役之所，  
百工比於幽囚，聚詛連羣，遮訴盈路，持綱者莫  
敢致詰，巡察者莫敢爲言，時有致詰爲言，翻謂

黨邪醜直、天子轂下、囂聲沸騰、四方觀瞻、何所  
取則、蕩心于上、歛怨於人、欺天陷君、遠邇危懼、  
此其罪之大者也、總制邦用、度支是司、出納貨  
財、大府攸職、凡是太府出納、皆稟度支文符、太  
府依符以奉行、度支憑按以勘覆、互相關鍵、用  
絕姦欺、其出納之數、則每旬申聞、其見在之數  
則每月計奏、皆經度支勾覆、又有御史監臨、旬  
旬相承、月月相繼、明若指掌、端如貫珠、財貨少  
多、無容隱漏、延齡務行邪諂、公肆誣欺、遂奏云

左藏庫司多有失落近因檢閱使置簿書乃於  
糞土之中收得銀十三萬兩其疋段襍貨百萬  
有餘皆是文帳脫遺並同已棄之物今所收穫  
卽是羨餘悉合移入雜庫以供別敕支用者其  
時特宣進止悉依所奏施行太府少卿韋少華  
抗表上陳殊不引伏確稱每月申奏皆是見在  
數中請令推尋足驗姦計兩司旣相論執理須  
辨鞠是非臣等具以奏聞請定三司詳覆若左  
藏庫遺漏不謬隱匿固合抵刑如度支舉奏是

虛誣誑亦宜得罪。陛下既不許差三司按問，又不令檢奏辨明。度支言太府隱漏至多，而少華所任如舊。太府論度支姦欺頗甚，而延齡見信不渝，枉直兩存。法度都弛，以在庫之物爲收獲之功，以常賦之財爲羨餘之費。罔上無畏，示人不慚。此又罪之大者也。國之府庫用寘貨財，物合入官，則納于其內。事合給用，則出乎其中。所納無非法之財，所出無不道之用。坦然明白，何曲何私。而延齡險猾售姦，詭譎求媚，遂於左藏



之內。肇建六庫之名。意欲別貯贏餘。以奉人主私欲。曾不知王者之體。天下爲家。國不足。則取之於人。人不足。乃資之於國。在國爲官物。在人爲私財。何謂贏餘。復須別貯。是必巧詐以變移官物。暴法以刻斂私財。捨此二途。其將焉取。陛下方務崇信。不加檢裁。延齡旣怙寵私。益復放肆。遂錄積久逋欠。妄云察獲姦賊。總計緡錢八百餘萬。聽其言則利益雖大。考其事則虛誕自彰。或是水火漂焚。或緣旱澇傷敗。或因兵亂散

失。或遭寇賊。做數。或准法免徵。或經恩合放。或  
人戶逃逸。無處追尋。或綱典拘囚。不免填納。或  
没入店宅。歲久摧殘。或收獲舟船。年深破壞。類  
皆如此。難以殫論。在人者。並無可科徵。屬官者  
悉不任貨賣。但存名額。虛掛簿書。大抵錢穀之  
司。皆耻財物減少。所以相承積累。不肯滌除。每  
當計奏之時。常充應在之數。延齡苟稱察獲。遂  
請徵收。恢張利門。誘動天聽。貽誚侮於方岳。賈  
愁怨於烝黎。于茲累年。一無所得。其爲踈妄。亦

曰殆哉。陛下姑欲保持。曾無詰問。延齡謂能蔽惑。不復懼思。姦威既沮。於四方儉態復行。於內府。由是蹂躪官屬。傾倒貨財。移東統西。便爲課績。取此適彼。遂號羨餘。愚弄朝廷。有同兒戲。諸州輸送布帛。度支不務準平。抑制市人。賤通估價。計其所折。卽更下徵。重困疲氓。展轉流弊。旣彰忍害。且示不誠。及其支送邊州。用充和糴。則於本價之外。例增一倍有餘。布帛不殊。貴賤有異。剝徵罔下。旣以折估爲名。抑配傷人。又以出



估爲利。事多矛盾。交駭物情。窮邊穡夫。痛憤切於骨髓。下土編戶。冤叫徹於蒼旻。而延齡以昂取折。估爲公忠。苟得出估爲贖利。所謂失人心而聚財賄。亦何異割支體以狗口腹哉。殊不寤支體分披。口安能食。人心離析。財豈能存。此又罪之大者也。平原遠鎮。扼制蕃戎。五原要衝。控帶靈夏。芟夷榛蕪。翦逐豺狼。崎嶇繕完。功力纔畢。地猶夔絕。勢頗孤危。新集之兵。志猶未固。尤資贍恤。俾漸安居。頓勅度支。令貯軍食。常使平



京有一年之蓄。鹽州積半年之儲。循環轉輸。不  
得闕數。近者二鎮告急。俱稱絕糧。陛下召延齡  
令赴中書。遣希顏宣旨質問。延齡確言饋餉不  
絕。儲蓄殊多。歲內以來。必無闕乏。希顏懼其推  
互。邀令草狀自陳。狀亦如言。略無疑畏。陛下覽  
其所奏。翻謂軍吏不誠。遂遣中官馳往檢覆。道  
路無轉運之跡。軍城無旬日之儲。將卒嗷嗷。幾  
將不守。有如是之顛沛。有如是之欺謾。按驗既  
明。恩勞靡替。其爲蠱媚曠代罕聞。此又罪之大

者也。國之憲度，會府是司。位列諸郎，猶應辰象。任居六事實代天工，內總轄於庶官。外敷化於列郡。舉措繫生靈之命，得失關理亂之源。爲人軌儀，安可容易。未有大宮池。縱而能使羣吏服從，朝典凌遲，而欲禁天下暴慢，是以天寶將季，楊國忠爲吏部尚書，亟於私庭，詮集選士，果令逆監得以爲詞，史策書之，足爲國耻，而延齡放情亂紀，又甚國忠，懈於夙興，多闕會朝之禮，狗其鄙欲，大隳省署之儀，徙郎曹於閭里，視公事

於私第。盡室。旣宮厨之饈。填街持簿領之書。復有諸部。叅辭。四方申請。決遣資其判署。去就俟其指揮。延齡或聚客大誇。不令白事。或縱酒憑怒。莫敢入言。至有迫切而來。逾旬未省。輸納之後。累月不歸。資糧罄於滯淹。筋力困於朝集。晨趨夕散。十百爲羣。里中喧闐。常若闐闐。衢巷列屠沽之肆。邑居成逆旅之津。恣欲慢官。虐人斃法。求之今古。鮮有其倫。此又罪之大者也。總領財賦。號爲殷繁。自非識究變通。智權輕重。大不



失體。細能析微。濟之以均平。蒞之以勤肅。近無  
滯事。遠無壅情。綱條之下。無亂繩。鑒照之內。無  
隱匿。然後人不困而公用足。威不厲而姦吏懲。  
苟或未能。則非稱職。况延齡以素所僻戾之質。  
而加之以狂躁滿盈。既憍且驕。事何由理。遂以  
國家大計。委於胥吏末流。當給者無賄而不支。  
應徵者受賂而縱免。紀綱大壞。貨賂公行。苟操  
利權。實竊邦柄。近者度支小吏。屢爲府縣所繩。  
鞠其姦賊。無不狼籍。通結動連。於節將。交私匪



止於苞苴。威福潛移。乃至於是。職司失序。固亦可知。此又罪之大者也。風教之大。禮讓爲先。禮讓之行。朝廷爲首。朝廷者。萬方之所宗仰。羣士之所楷模。觀而效焉。必有甚者。是以朝廷好禮。則俗尚敬恭。朝廷尊讓。則時耻貪競。朝廷有失容之慢。則凌暴之弊播於人。朝廷有動色之爭。則攻鬪之禍流於下。聖王知其然也。故選建賢德以爲公卿。使人具瞻。不論而化。昔周之方盛。多士盈朝。時靡有爭。用能俾乂。故其詩曰。慎爾

出話敬爾威儀無不柔嘉。又曰有來雍雍至此  
肅肅相維辟公。天子穆穆言羣臣相與事上敬  
而能和。言語動作靡有不善也。周德既衰小人  
在位務相侵侮以至危亡。故其詩曰方懋爾惡  
相爾矛矣。又曰旣之陰汝反予來嚇。又曰諒曰  
不可覆背善詈。小人得志惡怒是憑肆其偏心。  
以相諾病也。陛下勤修儀式以靖四方。慎選庶  
官以貞百度。內選則股肱耳目。外選則垣翰藩  
維。濟濟師師。咸欽至化。庶相感率。馴致太和。而

度支憑寵作威。恃權縱暴。侵刻軍鎮。匱闕資糧。將帥每使申論。延齡率加毀訾。或指誣隱盜。或謗訐陰私。或數其出處賤微。或臆其心志邪悖。詞皆醜媠。事悉加誣。匹夫見凌。猶或生患。况將帥素加委遇。多著勲庸。縱有踰分取求。但宜執理裁處。苟當其所。孰敢不從。豈可對彼偏裨。恣行侵辱。使其慚醜於麾下。憤耻於朝廷。惟口起羞。諒非細故。爲國聚釁。實由斯人。而又虐害羣司。幸其闕敗。蔑彼彝典。逞於兇懷。氣吞等夷。隸

蓄郎吏。時有履道而不爲曲撓。守官而莫肯脅從。遭其詆訶。事則尤劇。或辱兼祖父。或毀及家門。皆名教所不忍聞。敘述所不堪紀。其爲構陷。抑復多端。故示兇威。使人懾憚。人之狂險。乃至於斯。上虧大猷。下扇流俗。怱然禮義之府。蟻汚清明之朝。此又罪之大者也。度支舊管牛驢三千餘頭。車八百餘乘。循環載負。供饋邊軍。旣有番遍之倫。永無科配之擾。延齡苟逞近效。不務遠圖。廢其葺修。減其芻秣。車破畜耗。略無子遺。



須載運軍資。則令府縣差雇。或有卒承別旨。須赴促期。遂於街市之間。虜奪公私雜畜。披猖頗甚。費損尤多。吏因生姦。人不堪命。所減者則奏以爲利。所費者則隱而不論。破實徇虛。多如此類。度支應給宮內。及諸司使芻藁薪炭等。除稅草之外。餘並市供。所用旣多。恒須貯備。舊例每至秋穫之後。冬收之時。散開諸場。逐便和市。免費高價。復資貧人。公私之間。頗謂兼濟。延齡悉隳舊制。但飾姦情。旋計芻薪價錢。以爲節減。

剝利。及乎春夏之際。藁秸已殫。霖潦之中。樵蘇不繼。軍廩輟莖。官厨待然。告闕頻煩於聖聰。徵催絡繹於省署。崎嶇求買。何暇計量。糜損官錢。不啻累倍。聯蹇狼狽。率以爲常。此則睿鑒之所明知。物情之所深駭。事之外繆。觸緒皆然。臣愚以謂若斯之流。不過歲費國家百萬緡錢。及事體非宜耳。其爲罪惡。未足傾危。事之可憂。不在於此。是以不復詳舉。以煩聽覽也。至如矯詭之態。誣罔之辭。遇事輒行。應口便發。靡日不有。靡

時不爲自非狀跡尤彰足致其禍者又難以備  
陳也延齡有詐僞亂邦之罪七而重之以耗斲  
闕遺愚智共知士庶同憤以陛下英明鑒照物  
無遁情固非延齡所能蔽虧而莫之辨也或者  
聖旨以其甚招嫉怨而謂之孤貞可託腹心以  
其好進讒諛而謂之盡誠可寄耳目以其縱暴  
無畏而謂之強直可肅姦欺以其大言不疑而  
謂之智能可富財用將欲排衆議而收其獨行  
假殊寵而冀其大成儻陛下誠有意乎在茲臣

竊以爲過矣。夫君天下者，必以天下之心爲心，而不私其心。以天下之耳目爲耳目，而不私其耳目。故能通天下之志，盡天下之情。夫以天下之心爲心，則我之好惡，乃天下之好惡也。是以惡者無繆，好者不邪。安在私託腹心，以售其側媚也？以天下之耳目爲耳目，則天下之聰明，皆我之聰明也。是以明無不鑒，聰無不聞。安在偏寄耳目，以招其蔽惑也？夫布腹心而用耳目，舜與紂俱用之矣。舜之意務求己之過，以與天下



同欲而無所偏私。由是天下臣庶莫不歸心忠  
謹。既聞玄德逾邁。故虞書云。臣作朕股肱耳目。  
又云。明四目。達四聰。言廣大也。紂之意。務求人  
之過。以與天下違欲。而溺於偏私。由是天下臣  
庶莫不離心。險詖既行。昏德彌熾。故商書云。崇  
信姦回。大雅云。流言以對寇攘。式內言邪僻也。  
與天下同欲者。謂之聖帝。與天下違欲者。謂之  
獨夫。其所以布腹心。而任耳目之意。不殊。然於  
美惡成敗。若此相遠。豈不以求過之情有異。任

入之道不同哉。太宗嘗問侍臣何者爲明君何者爲暗主。魏徵對曰君之所以明者兼聽也其所以暗者偏信也。又曰秦之胡亥偏信趙高肆其姦欺卒至顛覆。徵之此說理致甚明。簡冊備書足爲鑒戒。趙高指鹿爲馬愚弄厥君。歷代流傳莫不痛憤。陛下每覽前史詳考興亡固亦切齒於斯人。傷心於其主。臣謂鹿之與馬物類猶同。豈若延齡掩有而爲無。指無而爲有。陛下若不以時省察得無使後代嗟誚又甚趙高者乎。

斯愚臣所以焦慮疚懷。以陛下爲過者。良有所以也。夫理天下者。以義爲本。以利爲末。以人爲本。以財爲末。本盛則其末自舉。末大則其本必傾。自古及今。德義立而利用不豐。人庶安而財貨不給。因以喪邦失位者。未之有也。故曰不患寡而患不均。不患貧而患不安。有德必有人。有人必有土。有土必有財。百姓足。君孰與不足。蓋謂此也。自古及今。德義不立而利用克充。人庶不安而財貨可保。因以興邦固位。亦未之有焉。

故曰財散則人聚。財聚則人散。與其有聚歛之  
臣。寧有盜臣。無令侵削兆庶。以爲天子取怨于  
下。其有若此者。行罰無赦。蓋爲此也。殷紂以貪  
冒失人而亡。周武以散發得人而昌。則紂之多  
藏。適所以爲害已者之資耳。尚何賴於財賄哉。  
太宗亦云。務蓄積而不恤人。甚非國家之計。隋  
氏不道。聚歛無厭。所實洛口諸倉。卒爲李密所  
利。此則前代已行之明效。聖祖垂裕之格言。是  
而不懲。何以爲理。陛下初膺寶曆。志翦群兇。師



原书缺页

原书缺页

旅繁興。徵求寢廣。權算侵剝。下無聊生。是以涇  
原叛徒。乘人怨咨。白晝犯闕。都邑咋庶。恬然不  
驚。反與賊衆相從。比肩而入。宮殿雖蚩蚩之性。  
靡所不爲。然亦由德澤未浹於人。而暴令驅迫。  
以至於是也。于是內府之積。尚如丘山。竟資兇  
渠。以餌貪卒。此時陛下躬觀之矣。是乃失人而  
聚貨。夫何利之有焉。車駕旣幸。奉天逆泚。旋肆  
圍逼。一壘之內。萬衆所屯。窘如涸流。廢物空匱。  
嘗欲發一健步。出視賊軍。其人懇以苦寒爲辭。

跪○奏○乞○一○襦○袴○陛○下○爲○之○求○覓○不○致○竟○憫○默○而○  
遣○之○又○嘗○宮○壺○之○中○服○用○有○闕○聖○旨○方○以○戎○事○  
之○急○不○忍○重○煩○於○人○乃○剝○親○王○飾○帶○之○金○賣○以○  
給○直○是○時○行○從○將○吏○赴○難○師○徒○倉○黃○奔○馳○咸○未○  
冬○服○漸○屬○疑○泣○且○無○薪○烝○飢○凍○內○攻○矢○石○外○迫○  
晝○則○荷○戈○奮○迅○夜○則○映○堞○呻○吟○凌○風○飈○冒○霜○霰○  
踰○旬○而○衆○無○攜○貳○卒○能○走○強○賊○全○危○城○者○陛○下○  
豈○有○嚴○刑○重○賞○使○之○然○耶○唯○以○不○厚○其○身○不○藏○  
其○資○與○衆○庶○同○其○憂○患○與○士○伍○共○其○有○無○乃○能○



可與共患  
難而不可  
與共安樂  
人主通病

使○搆○軀○命○而○扞○寇○讐○餒○之○不○離○凍○之○不○憾○臨○危○  
而○不○易○其○守○見○歿○而○不○去○其○君○所○謂○聖○人○感○人○  
心○而○天○下○和○平○此○其○效○也○及○乎○重○圍○既○解○諸○道○  
稍○通○賦○稅○漸○臻○貢○獻○繼○至○乃○於○行○宮○外○廡○之○下○  
復○列○瓊○林○大○盈○之○司○未○賞○功○勞○遽○私○賄○玩○甚○沮○  
惟○新○之○望○頗○携○死○義○之○心○於○是○輿○誦○興○譏○而○軍○  
士○始○怨○矣○財○聚○人○散○不○其○然○歟○旋○屬○蝨○賊○內○攻○  
翠○華○南○狩○奉○天○所○積○財○貨○悉○復○殲○於○亂○軍○  
岷○梁○日○不○暇○給○獨○憑○大○順○遂○復○皇○都○是○知○天○子○

貪賄成風  
自貽殃咎  
公之數言  
豈獨人主  
之戒實士  
大夫之良  
策也

者○以○得○人○爲○資○以○蓄○義○爲○富○人○苟○歸○附○何○患○蔑○  
資○義○苟○修○崇○何○憂○不○富○豈○在○貯○之○內○府○方○爲○已○  
有○哉○故○藏○於○天○下○者○天○子○之○富○也○藏○於○境○內○者○  
諸○侯○之○富○也○藏○於○困○倉○匱○匱○者○農○夫○商○賈○之○富○  
也○奈○何○以○天○子○之○貴○海○內○之○富○而○猥○行○諸○侯○之○  
弃○德○蹙○守○農○商○之○鄙○業○哉○陛○下○若○謂○厚○取○可○以○  
恢○武○功○則○建○中○之○取○既○無○成○矣○若○謂○多○積○可○以○  
爲○已○有○則○建○中○之○積○又○不○在○矣○若○謂○狗○欲○不○足○  
傷○理○化○則○建○中○之○失○傷○已○甚○矣○若○謂○歛○怨○不○足○

致危亡則建中之亂危亦至矣然而遽能靖滔天之禍成中興之功者良以陛下有側身修勵之志有罪已悔懼之詞罷息誅求敦尚節儉渙發大號與人更新故靈祇嘉陛下之誠臣庶感陛下之意釋憾迴慮化危爲安陛下亦當爲宗廟社稷建不傾不拔之永圖爲子孫黎元垂可久可大之休業懲前事徇欲之失復日新盛德之言豈宜更縱儉邪復行刻暴事之追悔其可再乎臣又竊慮陛下納彼盜言墮其姦計以爲



搏。噬。拏。攫。怨。集。有。司。積。聚。豐。盈。利。歸。君。上。是。又。  
大。繆。所。宜。慎。思。夫。人。主。昏。明。繫。於。所。任。咎。繇。夔。  
契。之。道。長。而。虞。舜。享。濬。哲。之。名。皇。甫。聚。楛。之。孽。  
行。而。周。厲。嬰。顛。覆。之。禍。自。古。何。嘗。有。小。人。柄。用。  
而。災。禍。不。及。邦。國。者。乎。譬。有。操。兵。以。刃。人。天。下。  
不。委。罪。於。兵。而。委。罪。於。所。操。之。主。蓄。蠱。以。殃。物。  
天。下。不。歸。咎。於。蠱。而。歸。咎。於。所。蓄。之。家。理。有。必。  
然。不。可。不。察。臣。竊。慮。陛。下。以。延。齡。之。進。獨。出。聖。  
衷。延。齡。之。言。多。順。宸。旨。今。若。以。罪。寘。辟。則。似。爲。



衆所擠故欲保持用彰堅斷若然者陛下與人  
終始之意則善矣其於改過不吝去邪勿疑之  
道或未盡善焉夫人之難知著自淳古試可乃  
已載於典謨陛下意其賢而任之知其惡而棄  
之此理之常于何不可倘陛下猶未知惡但疑  
見擠固有象恭挾詐之人亦有黨邪害直之士  
所資考覈兩絕欺誣陛下以延齡爲能愚臣以  
延齡爲罪能必有跡罪必有端陛下胡不指明  
其所效之能以表忠賢按驗其所論之罪以考

未路數段  
深切著明  
然而公自  
此危矣後  
進言者不  
可以公爲  
戒聽言者  
宜發深省

虛實與衆同辨示人不私若能跡可稱而罪端  
無據則是黨邪害直之驗也陛下當繩其傷善  
以勵事君罪端有徵而能跡無實則是象恭挾  
詐之驗也陛下當糾其包禍以戒亂邦如此則  
上之於下釋嫌構之疑下之於上絕偏惑之議  
何必忠邪無辨枉直莫分薰蕕同藏其臭終勝  
此則小人道長之象也實時運否泰安危之所  
繫豈但有虧聖德不利善人而已乎陛下若以  
必與已同者爲忠良自我作者無改變如此則

上之所欲莫不諂。上之所失莫不從。水火相濟。不爲非。金礪相須。不爲是。耻過作非。不足戒。捨已從人。不足稱。惟意是行。則匡輔或幾乎息矣。匡輔息。則理不可致。仲尼所謂一言喪邦者。在於予之言。而莫予違也。事關興亡。固不可忽。希旨順默。侵已成風。獎之使言。猶懼不旣。若又阻抑。誰當貢誠。伏恐未亮斯言。請以一事爲證。只如延齡克妄。流布寰區。上自公卿近臣。下逮輿臺賤品。誼譁談議。億萬爲徒。能以上言其人。有



人主請此  
宜發深省

通篇幾萬  
言極豪汗

又極嚴緊

坡公法之

使不如矣

信乎公之

雄才非四

大家所及

幾陛下誠令親信。博採輿詞。叅校比來所聞。足  
鑒人間情僞。臣以卑鄙。任當台衡。既極崇高。又  
承渥澤。豈不知觀時附會。足保舊恩。隨衆沉浮。  
免貽厚責。謝病黜退。獲知幾之名。黨姦苟容。無  
見嫉之患。何急自苦。獨當豺狼。上違懽情。下餌  
讒口。良由內顧庸昧。一無所堪。夙蒙眷知。唯在  
誠直。綢繆帳屨。一紀于茲。聖慈既以此見容。愚  
臣亦以此自負。從陛下歷播遷之艱。覩陛下  
致興復之艱難。至今追思。猶爲心悸。所以畏覆



陸宣公集  
車而駭懼慮毀室而悲鳴蓋情激于衷雖欲罷  
而不能自默也因事陳執雖已煩繁天聽尚高  
未垂諒察輒申烟款以極愚誠憂深故語煩懇  
迫故詞切以微臣自固之謀則過爲陛下慮患  
之計則忠糜軀奉君非所敢避沽名徯直亦不  
忍爲願迴睿聰爲國熟慮社稷是賴豈唯微臣  
不勝荷恩報德之誠謹昧死奉書以聞臣誠惶  
誠恐頓首再拜

陸宣公奏草卷之二十四

終